



**BIDZE GOUVERNMAN SESEL  
Pour Lannen Finansyer 2019**

***Tenm: "Stabilite ek Progresyon"***

**Delivre par:**

**Anbasader Maurice Loustau-Lalanne**

**MINIS POUR FINANS, KOMERS, LENVESTISMAN E PLANIFIKASYON  
EKONOMIK**

**Dan Lasanble Nasyonal Sesel**

**Ile Du Port, Viktorya, Mae, Sesel**

**Lendi le 5 Novanm, 2018**

**9.00 er bomaten**

## LATAB KONTENI

	<b>Paz</b>
<b>1. LENTRODIKSYON</b>	<b>4</b>
<b>2. APERSI ZENERAL LO LEKONOMI AN 2018 E DAN TERM MWAYEN</b>	<b>4</b>
2.1. Sekter Reel	4
2.2. Sekter Monneter	5
2.3. Sekter Eksteryer	6
<b>3. PERFORMANS BIDZE 2018</b>	<b>6</b>
<b>4. PROZEKSYON POUR LANNEN FISKAL 2019</b>	<b>7</b>
4.1. Lobzektif Primer	7
4.2. Reveni	7
4.3. Depans Gouvernman	7
4.3.1. Saler ek Reminerasyon	9
4.3.2. Depans dan bann sekter kle	11
4.3.2.1. Ledikasyon	12
4.3.2.2. Lasante	13
4.3.2.3. Lagrikiltir	14
4.3.2.4. Lilizasyon Later ek Labita	16
4.3.2.5. Gouvernman Lokal	17
4.3.2.6. Zafer Lafanmir ek Devlopman Sosyal	17
4.3.2.7. Lazenes ek Sport	18
4.3.2.8. Sekirite Nasyonal	19
4.3.2.9. Biro Prokirer Zeneral	19
4.3.2.10. Bann Lotorite Apwentman Konstitisyonnèl ek bann Antite Legal	20
<b>5. DEVLOPMAN DAN BANN SEKTER KLE</b>	<b>20</b>
5.1. Sekter Lanvironnman ek Lenerzi	20
5.2. Sekter Lapes	21
5.3. Sekter Lanplwa	22
5.4. Klima Lenvestisman e Pti ek Mwayen Lantrepriz	23
5.5. Lenformasyon Teknolozi ek Kominikasyon	25
5.6. Lekonomi Ble	26
5.7. Devlopman Sekter Finansyel	27
5.8. Sekter Transpor	29
5.9. Sekter Tourizm	30
5.10. Lar, Lakiltir ek Leritaz	30
<b>6. BIDZE 2019 POUR PROGRAMM SOSYAL</b>	<b>31</b>
<b>7. DEPANS ENPREVI</b>	<b>32</b>
<b>8. NOUVO POLISI DAN BIDZE 2019</b>	<b>32</b>
8.1. Logmantasyon Saler Minimòm	32
8.2. Logmantasyon bann Benefis ek Programm Aprove pou Lazans pour Proteksyon Sosyal	33
8.3. Logmantasyon Alawenns Etidyan dan Lenstitisyon Ledikasyon Tersyer.	33

	<b>Paz</b>
8.4. Revwar Skim sibvansyon lakaz e Kontribisyon personnel par HFC pour bann rezidan Pralen ek Ladig	33
8.5. Retir VAT lo ton dan bwat	33
8.6. Taks Propriyete Imobilye	34
8.7. Taks Disik	34
8.8. Taks ‘Excise’ lo Taba	34
8.9. To Revize lo Taks lo Enportasyon Lavyann Poul e Lentrodiksyon Taks lo Enportasyon Lavyann Pork.	34
8.10. Ranboursman Taks Valer Azoute (VAT) lo Prodwi ki’n Aste Lokalman par bann biznes ki enplike dan Lagrikiltir ek Lapes	35
8.11. Lamannman Lezislasyon ki Gouvern Taks lo Konsesyon Karbiran	35
8.12. Reform Taks Biznes	36
8.13. Definisyon Reveni An Gro anba Lakt ki gouvern Taks anba program Responsabilite Sosyal (CSR), 2013 e Lakt ki gouvern Taks dan domenn Marketing pour Tourizm.	38
8.14. Lenplimantasyon lalwa pour Peyman Drwadoter vizavi Lasosyasyon Loter ek Konpoziter Sesel (SACS)	39
8.15. Lentrodiksyon en Fre pour Preskripsyon dan Sistenn Lasante	39
8.16. Revizyon dan bann Kou ek Fre	39
8.17. Revi Lezislativ bann Lalwa Nasyonal lo Propriyete Entelektyel	40
8.18. Prosedir pour met anfors Lalwa pour Aksyon Remedyal dan Komers, e son Dezyenn Faz Lenplimantasyon	40
<b>9. REFORM DAN KOLEKSYON REVENI GOUVERNMAN</b>	<b>40</b>
9.1. Lotorite Laysenning Sesel	40
9.2. Transfer Pricing and Kad Deklarasyon Kolektiv (Common Reporting Standards)	41
9.3. Sekter Enformel	42
9.4. Aryeraz Taks Komisyon Reveni Sesel	42
<b>10. LOPORTINITE LENVESTISMAN</b>	<b>42</b>
<b>11. ZESYON DET PIBLIK</b>	<b>43</b>
<b>12. FORMAT ZESYON GOUVERNMAN KI BAZE LO REZILTA</b>	<b>43</b>
<b>13. LANGAZMAN SOSYETE SIVIL</b>	<b>44</b>
<b>14. KONKLIZYON</b>	<b>44</b>

# Rezimen Diskour Bidze pour Lannen Finansyer 2019

## 1. LENTRODIKSON

Msye Spiker,  
Onorab Lider Lopoziyon,  
Onorab Lider Zafer Gouvernman,  
Manm Onorab Lasanble Nasyonal,  
Pep Seselwa.

Bonzour

Msye Spiker, 10 an pase, nou nasyon ti anbank lo en vwayaz pour en transformasyon ekonomik. Ti en swa difisil – me nou ti deside, koman en nasyon, pour pran en larout ver soutenabilite ekonomik atraver en program reform makroekonomik ki ti vize ver restorasyon stabilite zeneral, e ki ti pou met Sesel lo semen soutenabilite fiskal. Semenn pase, nou'n selebre 10an program reform ekonomik e nou'n vwar progre ki nou'n fer, baze lo devlopman sosyo-ekonomik nou pei. Pour sa dernyen 10an, nou balans bidze primer in reste an mwayenn, parlao 5%. Me ozordi, nou pe prevwar en balans bidze primer 2.5% dan mwayen term. Nou krwasans ekonomik in reste parlao 3% nou Prodwi Domestik Brit (GDP).

Nou'n reste stab malgre presyon ekonomik lo marse mondyal. Nou annan en gran lalis lenfrastruktir ki nou bezwen devlope si nou anvi anmenn Sesel dan son prosen letap devlopman.

Msye Spiker, sak Seselwa i bezwen vwar son prop devlopman dan progre son pei. Personn pa merit ganny kit deryer akoz i vilnerab. Ki mannyer nou kapab vin pli prodiktiv e responsab koman en nasyon, e donk anmenn plis krwasans ekonomik pour devlopman Sesel, ki an rezilta i a benefisyen nou tou. Nou kapab fer sa, selman atraver en zefor kolektiv, baze lo loportinite ki annan. Gouvernman, sekter prive ek sosyete sivil i bezwen travay ver en sel bi – pour devlopman Sesel.

Msye Spiker, avek sa antet, tenm ki'n swazir pour bidze 2019 i “*Stabilite ek Progresyon*”.

## 2. APERSI ZENERAL LEKONOMI AN 2018 E DAN MWAYEN TERM

### 2.1. Sekter Reel

Msye Spiker, swivan en peryod ekonomik tre stab ziska prezan an 2018, nou prediksyon pour krwasans reel Prodwi Domestik Brit (GDP) ver lafen lannen i reste lo 3.6%, parey nou ti'n prozekte inisyman. Sekter Tourizim pe zeneralman kontinyen kontribye anver nou krwasans, malgre ki'n annan en pe mwens aktivite dan sa sekter konpare avek sa de dernyen lannen. An konparezon ek lannen 2017, larive bann viziter in reste lo 1% ziska prezan an 2018. Malgre sa, reveni tourizim in reste rezilyan. Bann sif provizyonnel sorti Labank Santral ver lafen Septanm 2018 i montre en logmantasyon 8.2% dan reveni, konpare ek menm peryod lannen pase. Sekter Lenformasyon ek

kominikasyon pe kontribye konsiderableman anver sa krwasans. Sa i an rezilta logmantasyon dan lizaz lenformasyon ek diversifikasyon bann prodwi dan sa sekter, ki'n kree plis konpetisyon.

Sekter Fabrikasyon osi pe montre bann sif pozitif. Dan sekter prodiksyon manze, par egzanp, i ekspekte annan plis krwasans malgre lenpozisyon kota lo lapes ton zonn. Statistik Prodiksyon sorti Biro Statistik in montre ki ver dezyenm kar 2018, en total 25,653 tonn bwat ton in ganny prodwi – e sa i en rikord dan prodiksyon ton. I reprezant en krwasans 35% konpare ek menm peryod lannen pase. Menm kalite krwasans i ekspekte dan prodiksyon lalkol ek sigaret. Donk, nivo prodiksyon in zeneralman ogmante sa lannen konpare ek lannen pase. Prodiksyon labyer ek Gines in ogmante par 3% e 41% respektivman. Lefet ki lakonpanyen mazer dan sekter labwason in investir dan son limaz e anmenn nouvo prodwi, in ede pour anmenn plis krwasans dan sa sekter. Sepandan, prodiksyon labwason for in rikord en krwasans negativ 33%. Finalman, nouvo proze tel ki elevasyon danm e bann proze lozman sosyal ki gouvènmant pe kontinyen fer, pe ogmant aktivite dan sekter konstriksyon.

Fon Monneter Enternasyonal, dan son rapor Zilyet lo apersi Lekonomi Mondyal, pe predir en to krwasans 3.9% an 2018. Sa pe ganny soutenir par en bon lelan dan lekonomi, santiman favorab lo marse, bann kondisyon finansyel favorab, e lefet ki in annan en amelyorasyon dan pri komodite ki an retour, i a permet kondisyon parmi bann eksportater komodite pour amelyore.

Msye Spiker, estimasyon krwasans reel dan Prodwi Domestik Brit an 2019, in ganny estimen lo 3.4%. Sa i montre en pti ralantisman – me toudmenm, sa amelyorasyon zeneral i an rezilta en krwasans konstan dan sekter tourizm ki pe ganny soutenir par en bon latmosfer komersyal dan sa sekter, ensi ki lekspektasyon pour annan en logmantasyon dan lakantite vol aeryen ki vin Sesel. Plis devlopman dan domenn Lenformasyon Teknolozi ek Kominikasyon, ensi ki en lapros pli pozitiv dan domenn konstriksyon, dapre lenformasyon kot Biro Lenvestisman, in osi zwe en rol dan sa amelyorasyon. Nivo krwasans dan domenn prodiksyon manze i ekspekte montre menm rezilyans, apre sa bon lelan ki ti annan dan sa sekter an 2018.

Dan mwayen term, i ekspekte ki krwasans ekonomik Sesel pou reste stab, avek en mwayenn 3.5% krwasans. Me sa krwasans i depan lo stabilite bann faktor domestik e enternasyonal. Nenport sanzman mazer dan okenn sa bann faktor i kapab enfliyans sa nivo krwasans. Sa i konpri prensipalman, sanzman dan pri karbiran ek pri lezot komodite, ensi ki okenn kriz mazer dan bann marse kle. Krwasans dan mwayen term pou ganny pouse prensipalman par aktivite tourizm, Lenformasyon ek Kominikasyon, sekter finans ek lasirans, ensi ki sekter fabrikasyon, dan tou le de kad, lavant an gro e an detay.

## **2.2. Sekter Monneter**

Pandan premye kar 2018, polisi monneter ti ganny mentenir prenan kont ki prozeksyon lenflasyon pa ti pou ariv en nivo ki ti pou met an danze lobzektif prensipal Labank Santral. Sepandan, polisi monneter ti ganny sere en pe plis dan dezyenm kar 2018, en pozisyon ki Labank Santral in mentenir

pour larestan lannen avek bi minimiz presyon lenflasyon ki pe ganny prevwar, an rezilta bann devlopman entern e extern. Prenon kont son polisi pour ser en pe plis, depi le premye Avril 2018, lentere pli ba e pli o ti ganny ogmante. Lentere lo fasilite depozit ti ganny ogmante sorti 1% pour vin 2% e lentere lo fasilite kredi ti ganny ogmante sorti 6% pour vin 8%.

Lenflasyon dan dezyenm morso sa lannen, ti ganny afekte dapre sezon, prensipalman par pri pwason, e osi avek presyon depresyasyon rouni Sesel. Ver Septanm 2018, letan nou regard lenflasyon lo Septanm 2017 ti 3.3% e lenflasyon anyel sorti en lannen pour en lot ti 3.7%.

Nou pe antisip plis presyon lenflasyon a lavenir, ler nou get bann prediksyon pri komodite lo marse global, e bann demann ki pe kontinyen ogmante lokalman. Labank Santral i reste angaze pour anver son lobzektif primer pour aziste polisi pour asir stabilite pri komodite lo marse domestik.

## **2.2. Sekter Eksteryer**

Pou napa en gran sanzman lo pozisyon ekstern nou pei konpare avek lannen 2017. Defisit lo Kont Kouran 'Current account' in ganny estimen pou fini lannen avek 19.5 pousan Prodwi Domestik Brit (GDP) konpare avek 19.9 pousan Prodwi Domestik Brit (GDP) an 2017. Sepandan letan ou konpar sa, an term dolar ameriken, sa defisit pe ganny prozekte pou sorti 296 milyon dolar ameriken an 2017 pour ariv 305 milyon dolar ameriken an 2018.

Le 26 Oktob 2018, valer total reveni pei an term deviz etranzer oubyen bann *inflows* dan sistenm banker ti US\$511 milyon, ki reprezant en logmantasyon 13% konpare ek menm period an 2017. Sa i reprezant prensipalman kontribisyon dan sekter tourizm ek lapas. Pandan sa menm peryod, demann total ouswa depans ti 499 milyon dolar ameriken, e sa i reprezant en logmantasyon 11 pousan letan nou konpar avek menm peryod an 2017. Pli gro pousantaz sa bann depans ti pou lenportasyon karbiran e osi komodite.

An sa ki konsern nivo rezerv enternasyonal ki ganny zere par Labank Santral i aktyelman 555 milyon dolar ameriken ouswa 3.8 mwan lenportasyon Prodwi e Servis.

## **3. PERFORMANS BIDZE 2018**

Msyé Spiker, I ekspekte ki Gouvernman i a fini sa lannen finansyer ek en balans primer, SR 657.4 milyon oubyen 3.0% Prodwi Domestik Brit (GDP), konpare ek bidze orizinal ki ti SR 553.6 milyon oubyen 2.5% Prodwi Domestik Brit (GDP).

Zeneralman, performans taks in tre byen ziska prezan. Koleksyon reveni ziska Out 2018 ti 2.6% plis ki menm peryod lannen pase. Sonm total ki ti'n antre ver lafen Out ti SR 4.5 bilyon, ki reprezant 20.6% Prodwi Domestik Brit (GDP). Reveni koleksyon taks ki pa enkli koleksyon taks sekirite sosyal ki pa ti ankor peye i ekspekte ariv en total SR 7.19 bilyon an 2018.

Estimasyon pour lafen lannen in en pe mwen pozitiv an konparezon avek Revizyon Bidze milye lannen, ki ti pli optimis, avek en rediksyon 4.6% oubyen SR 42 milyon. Sa i reflekte en performans negativ ki'n persiste dan serten domenn. Sepandan, lefet i reste ki performans zeneral i reprezant en logmantasyon konsiderab lo prediksyon bidze inisyel, ki ti SR 6.85 bilyon. Performans in

mwens ki an 2017 anba Taks Biznes), ek Taks Lenportasyon lo lalkol enporte ek lezot prodwi, in annan bann retonbe negative. Koleksyon lo VAT Domestik in perform pli byen prenon an kont pli bon performans dan sekter depans tourism. E osi en pli bon lekspektasyon dan kad Taks lo saler prenon an kont ki serten aryeraz pe aprezan komans antre.

Msye Spiker, nou'n rekomann de bidze siplemanter pandan 2018. Premye ti en logmantasyon SR 218 milyon dan depans. Dezyenm ti en depans an gro, lavaler zis SR 196.9 milyon, ler nou pran an kont bann seving ki nou'n fer e repartaz dan bize sa lannen.

#### **4. PROZEKSYON POUR LANNEN FISKAL 2019**

##### **4.1 Lobzektif Primer**

Lobzektif Primer sa Bidze 2019 i konm swivan:

- Pour konsolid nou pozisyon fiskal e atenn en sirplis primer 2.5%, depi 2019 ziska 2021
- Onor nou bann det e asire ki total det piblik i ganny redwir ziska anba 50% Prodwi Domestik Brit ver lannen 2021
- Konsolid Programm Sosyal Gouvernman
- Investir dan lenfrastruktir pour siport krwasans ekonomik
- Investir dan proze ek program ki pou amelyor lavi nou bann sitwayen

##### **4.2 Reveni**

Msye Spiker, an 2019, nou anvizaze kolekte en reveniki total ki enkli donasyon SR 8.95 bilyon konpare avek SR 8.83 bilyon dan bidze amande 2018. Ladan, SR 7.5 bilyon i reveni taks, ki reprezant 84% reveni total ki'n kolekte. En total SR 1.25 bilyon in ganny prozekte pour bann reveni ki pa dan kategori taks, e SR 209.2 milyon koman donasyon.

##### **4.3 Depans Gouvernman**

Pour lannen 2019, Gouvernman pe propoz en bidze SR 8.46 bilyon, konpare ek en bidze orizinal, ek sa de bidze siplemanter, ki an total nou depans i SR 8.35 bilyon. Sa i reprezant en logmantasyon selman SR 112.3 milyon oubyen 1.3%.

Msye Spiker, bidze total pour portfey Ledikasyon, Lasante, ek Zafer Lafanmir i reprezant SR 3.5 bilyon oubyen 41.9% bidze total. Sa i montre langazman Gouvernman anver akse avek Idikasyon ek swen lasante.

Msye Spiker, avan mon komanse, mon anv soulinyen ki le 11 Okton 2018, Labank Mondyal ti pour lapremyer fwa, pibliy en Lendeks Kapital Imen. Sa lendeks i swiv bann pei e vwar si zot fer li posib pour bann fanmir devlope e epanouir. Eski bann zanfan ki'n ne dan sa pei i annan en bon sans pour reisir e atenn tou zot potansyel? Sa lendeks i analiz kondisyon lasante, ledikasyon, ek

to mortalite pour deside si en zanf an ki'n ne dan en pei partikilye, pou viv ou realiz tou son potansyel. Zot regarde si sa bann zanf an pou viv ase lontan pour devlop tou zot potansyel si zot ti'n ganny akse lib avek ledikasyon ek lasante.

Tandis ki laplipar lendeks i get kwa ki en pei in akonplir, sa enn lendeks i konpar sa ki sa pei in atenn avek sa ki i ti'n kapab atenn. Sesel in sorti 43<sup>enn</sup> dan 157 pei. Annefe, nou premye dan larezyon, e premye dan Lafrik. Pei Lafrik ki pli pros avek nou lo sa lendeks i dan 52<sup>enn</sup> pozisyon. Nou skor 68% i vadir ki sak nouvo ne in annan 68% sans atenn tou zot potansyel koman en adilt. An Sengapour, pei ki ti annan pli o sans atenn son potansyel total an term en adilt, sa lendeks in rikord 88%.

Sa i montre ki sa ki gouvannman in investir dan sa bann sekter in anmenn rezilta. Me nou bezwen kontinyen fer plis pour asir en bon efikasite ek rezilta ki enpakte direkteman lo nou pep. Msye Spiker, an plis ki sa, Gouvannman in komans en travay pour revwar bann model ki i servi dan sa trwa sekter pour asire ki:

- I konekte byen avek marse lanplwa
- Kou ki asosye avek vyeisman i ganny byen zere, e
- Asire ki kou finansyer sekter lasante ek Lazans Proteksyon sosyal i kapab ganny soutenir dan mwayen term.

Msye Spiker, koman parti lanons ki'n fer avan, bidze 2019 pa pou enkli bidze pour trwa antite Gouvannman. Lotorite Lapes ek Lotorite Park Maren pou fonksyonn andeor bidze 2019. Konmansman Zanvye 2019, komisyon ki sirvey bann lantrepriz piblik pou sirvey zesyon sa de antite. Me selman, en total SR 28.15 milyon ek SR 10.27 milyon in ganny akorde pour Lotorite Lapes ek Lotorite Park Maren respektivman. Sa i en davans tanporer lo en sonm total ki sa de lorganizasyon pe ganny prete, dan premye sis mwan 2019. I pou ganny repeye an plen pandan 2019. Adisyonneman, SR 47.5 milyon in ganny bidzete koman '*dividend*' ki Lotorite Lapes pou peye.

Msye Spiker, an 2018, SR 32.7 milyon ti ganny akorde pour Lazans Finansman Pti Biznes. Enn bann mezir reform striktirel dan bidze 2019, se ki SBFA pou nepli egziste koman en lorganizasyon separe. Gouvannman pou kree en Lantrepriz Fon Devlopman pour bann Pti ek mwayen biznes anba Labank Devlopman. Balans kont SBFA ti SR 46.3 milyon le 31 Oktob 2018. Saverdir, napa fon ki'n ganny akorde pour SBFA dan bidze 2019. Me selman, larzan dan sa kont pou ganny transfer dan sa fon dan Labank Devlopman. Komansman 2020, gouvannman pou met en sonm SR 20 milyon par an dan sa nouvo fon dan Labank Devlopman. Msye Spiker, bann travayer SBFA pou annan opsyon pour swa transfer dan lezot Minister ek Departman Gouvannman, oubyen dan sa nouvo portfey dan Labank Devlopman.

Msye Spiker, an 2019, gouvannman pou kontinyen evalye lezot opsyon kot i kapab aplik bann mezir pour redwir kou. Sa bann mezir i a ganny aplike avek bi pour met fon dan plis program priyoriter.

Msye Spiker, a ler aktyel, *Trust Fund* Lanvironnman ek *Trust Fund* pour elevaz zannimo i bann *revolving funds* ki servi pour finans bann proze ki bann minister dan domenn lanvironnman ek lagrikiltir i antreprann.



Sa i ganny fer atraver en kont separe pour loperasyon ek komers, an plis ki lasistans bidzeter ki sa bann lorganizasyon i gannyen pour proze lenvestisman dan sekter piblik (PSIP). Sa de fon i ganny zere par en Bord. Toudmenm, a parti Zanvye 2019, *Trust Fund* Lanvironnman ek *Trust Fund* pour elevaz zannimo pou ganny enkli dan prosedir bidze.

*Trust Fund* pour elevaz zannimo pou ganny plase anba Proze Kapital ek lasistans ki benefisye fermye direktman dan bidze SAA, osibyen ki finansman pour ADF anba Labank Devlopman, anliny avek bann lobzektif sa fon:

- resers, devlopman ek amelyorasyon kapasite dan sekter lagrikiltir;
- konstriksyon semen, fasilite irigasyon, stokaz delo e sistenm drenaz pour fermye;
- skim lasirans pour fermye;
- lasistans parsyel pour bann kou labatwar;
- lasistans pour fon Devlopman Lagrikiltir

Dan ka *Trust Fund* Lanvironnman, sa i lye direktman avek manda sa lorganizasyon pour montre klerman, lekel bann proze ki pe ganny finanse dan sa vot :

- pour enplimant bann program pour anpes e redwir polisyon;
- pour promouvwar ledikasyon lanvironnman ek resers;
- pour netway e anbelir Sesel;
- pour fer nenport lezot keksoz ki nesese oubyen ki anliny avek proteksyon, konservasyon oubyen lamelyorasyon lanvironnman.

Adisyonneman, gouvrenman pou evalye lezot fon ki zot reveni i ganny mete dan komers, ensi ki bann kont loperasyon, pour determinen si i vyab pour aplik sa menm mekanizm.

Gouvrenman Sesel pe travay avek Gouvrenman Lenn pour resevwar en don lavalè SR 602.6 milyon, pour konstrir 27,379 met kare lespas pour lofis, ki a amenaz plizyer minister, departman ek lazans. Nou pe anvizaze ki sa proze i a komans tar an 2019, e nou pe ekspekte en seving anviron SR 50 milyon par an dan lokasyon lofis ler sa proze in konplete. Bann lofis ki Gouvrenman pe lwe konmela i ava vin disponib pour sekter prive, e nou swete ki kou lokasyon i a bese.

#### **4.3.1 Saler ek Reminerasyon**

Msye Spiker, dan bidze 2019, SR 2.67 bilyon in ganny akorde pour Saler ek Reminerasyon. Sa i reprezant 11.3 pousantaz lo total Prodwi Domestik Brit ki'n ganny prevwar. Total Saler ek Reminerasyon i reprezant 31.5 pousantaz bidze 2019.

Msye Spiker, en sonm SR 58.5 million in ganny akorde pour revizyon oubyen lentrodiksyon bann skim saler.

Sa bann skim saler swivan pou ganny revize a parti Zanvye 2019;

- Retention allowance pour bann Dental and Allied Professional, Health Care Assistant ki travay dan Lotorite Lasante Piblik
- Revizyon sipleman ek risk allowance bann dokter,
- Alawenns pour bann anlwaye Bibliotek ek Arsiv dan Departman Kiltir

- Zofisye Transpor lo Semen
- Lazisteman lo saler debaz Komisyon Reveni
- Zofisye welfer dan Lazans Proteksyon Sosyal
- Zofisye veteriner dan Servis Nasyonal pour Biosekirite
- Departman Lanplwa
- Brassband dan Departman La Defans
- Kad zofisye resers dan tou minister, departman ek lazans.

Sa bann skim swivan pou ganny revize a parti Zilyet 2019;

- Departman Lapolis
- Lazans Servis Tenny Dife
- Departman Servis Prizon
- Kad Diplomatik pour bann travayer ki travay dan Headquarters dan Minister Zafer Etranzer
- Biro Prokirer Zeneral

Msye Spiker, lenpakt pour lannen antye vizavi sa bann skim swivan ki'n komans lenplimantasyon depi 2018 me ki pa ti dan plan bidze orizinal, in ganny bidzete:

- IT Support Cadre
- Stores e Menazman bann Asset Cadre
- Asistan Personnel (sekreter)
- Travayer Legal dan tou minister, departman ek lazans.

Msye Spiker, dan bidze 2018, Gouvernman in anons lentrodiksyon en alawenns pour long servis an 2019. Gouvernman pou entrodwir en alawenns long servis pour bann anplwaye gouvernman ki pa lo kontra, a parti Zilyet 2019:

<i>Kantite lannen servis</i>	<i>Alawenns mansyel an Roupi Sesel</i>
<i>5 ziska 10 an</i>	<i>500</i>
<i>10 ziska 15 an</i>	<i>1,000</i>
<i>15 ziska 20 an</i>	<i>1,500</i>
<i>20 ziska 25 an</i>	<i>2,000</i>
<i>25 ziska 30 an</i>	<i>2,500</i>
<i>30 ziska 35 an</i>	<i>3,000</i>
<i>35 ziska 40 an</i>	<i>3,500</i>
<i>Plis ki 40 an</i>	<i>4,000</i>

Sa i pou kout SR 50.6 milyon dan bidze 2019 budget ek SR 101.3 milyon dan bidze 2020. Msye Spiker, sa i pour asire ki travayer pli eksperyans dan Servis Piblik i ganny konpansasyon pour son leksperyans. Sa i pou osi aplikab pour travayer sipor tel ki zofisye sekirite, korporativ klinier ek lezot staf menntenens ki annan en kontra a plen tan avek Gouvernman.

Msye Spiker, nonm dimoun ki anploye ek Gouvernman dapre statistik Out 2018 i 10,351. Adisyonneman, saler an mwayenn dan sektè Gouvernman i SR 14,598 konpare ek SR 11,318 dan sektè prive, dapre bilten statistik ki Biro Statistik in pibliye dan dezyenm kar sa lannen. Dan menm rapor, in ganny soulinyen ki 64% lafors travayer total pe travay dan sektè prive, konpare ek 21% ki pe travay dan Gouvernman, ek 15% ki pe travay dan bann lantrepriz Gouvernman.

Msye Spiker, Prezidan Larepublik ti apwent en komite le 5 Zanvye 2018 pour revwar Lakt Reminerasyon Servis Piblik, 2013. Sa komite ti propoz en logmantasyon 5% lo saler debaz, dapre latab Reminerasyon e saler Servis Piblik. Gouvernman in aprouv sa rekomandasyon, e sa pou ganny enplimante a parti Zilyet 2019. En provizyon of SR 42 milyon in ganny fer dan bidze 2019.

Msye Spiker, mon oule fer resorti ki 54% lafors travay pep Seselwa pa pe pey okenn taks lo zot saler, an vi ki taks pa ganny tire lo premye SR 8,555.50, e konmela i annan 13 lezot reminerasyon ki ganny legzanmpsyon taks. Sa i form parti sistenm progresiv taks lo saler. Detrwa legzanp sa bann reminerasyon ki ganny legzanmpsyon taks i:

- a) Tou peyman konpansasyon,
- b) Tou peyman Gratwite pour long servis
- c) Bonous ki pa depas en douzyenm lo saler debaz anyel
- d) Trezyenm Mwan Saler, anliny avek spesifikasyon Lakt Lanplwa
- e) Peyman lafen kontra lo en limit 15% saler debaz total ki sa anlwaye in travay pandan sa peryod kontra,
- f) *Service Charges*, e
- g) Peyman *Overtime* dapre Lakt Lanplwa.

Msye Spiker, Gouvernman pe osi propoze pour enkli bann alawenns tel ki inducement allowance dapre skim saler, ler peyman lafen kontra i ganny kalkile. Sa pou pran lefe an 2019. Sepandan, sa pa pou enkli bann alawenns peryodik ek alawenns marketable skills. En provizyon SR 5 milyon in ganny fer pour sa.

#### **4.3.2 Depans dan bann sektè kle**

Msye Spiker, an 2019, en sonm SR 2.82 bilyon in ganny prevwar pour Prodwi e Servis, e SR 884.7 milyon in ganny prevwar pour depans kapital. Depans total anba Prodwi e Servis i reprezant 33.3% total bidze nasyonal, oubyen 12% Prodwi Domestik Brit (GDP). Depans total anba depans kapital i reprezant 10.5% lo total bidze nasyonal, oubyen 3.8% Prodwi Domestik Brit (GDP).

Msye Spiker, apard depans kapital ki'n ganny prevwar pour bann minister, departman, ek lazans, i osi annan en provizyon SR 123.1 milyon e SR 296.4 milyon anba bann *grants* pour devlopman ek *Net Lending* pour lantrepriz piblik. Savedir, an total, sa i reprezant ankor 5% dan bidze nasyonal, oubyen 1.8% Prodwi Domestik Brit (GDP) pour lenvestisman kapital pour lantrepriz piblik.

#### 4.3.2.1 Ledikasyon

Msye Spiker, en total SR 1,044 milyon in ganny prevwar pour sektor ledikasyon, ki reprezentant 12.1% bidze nasyonal, oubyen 4.5% Prodwi Domestik Brit. 47% depans total dan sektor ledikasyon i al dan saler ek reminerasyon, vi ki sa sektor i anploy 2,461 travayer, ki reprezentant 23.8% lafors travayer dan servis piblik. An term poursantaz, sa i reprezentant 18% saler ek reminerasyon total dan Gouvernman.

Msye Spiker, en total SR 262.3 milyon in ganny prevwar dan kad Prodwi e Servis pour Minister Ledikasyon ek Devlopman Resours Imen. Mazorite depans anba Prodwi e i konm swivan:

- Depans lo liv SR 1.5 milyon
- Kou legzanmen SR 11.1 milyon
- Depans lo materyo lekol SR 3.5 milyon
- Depans lo liniform SR 3.3 milyon
- Lokasyon lakaz pour ansenyan etranze SR 43.2 milyon
- Depans pour servis sekirite SR 34.3 milyon
- Depans pour servis netwayaz SR 44.1 milyon
- Provizyon servis manze lekol SR 13.5 milyon
- Formasyon ansenyan SR 9.7 milyon

Msye Spiker, Departman Teknolozi Lenformasyon ek Kominikasyon, an partenarya ek Seychelles Cable System Company ek trwa lezot operater (Cable and Wireless, Airtel ek Intelvision), e Minister Ledikasyon ek Devlopman Resours Imen, pe fer provizyon bann bandwidth enternet sibstansyel pour tou lekol primer ek segonder leta. Sa i enkli servis zesyon rezo (network management services) ki nesaser, ensi ki provizyon WiFi dan tou lekol. Apard ki 4 lekol ki pa ankor ganny lenfrastruktir nesaser pour sa servis, tou lekol leta pe benefisyé. Me i ekspekte ki ver lafen sa lannen, sa 4 lekol ki napa sa servis i a gannyen. Provizyon sa servis pa'n kout Minister Ledikasyon ek Devlopman Resours Imen, nanryen. Bann parti konsernen ansanm ek sa minister ti siny en lagreman konsernan provizyon sa servis an Fevriye 2018.

Msye Spiker, provizyon in ganny fer pour en total SR 90.1 milyon anba Depans Kapital pour lannen 2019 pour Minister Ledikasyon ek Devlopman Resours Imen. Domenn prensipal ki pou sibir sa bann depans anba Proze Kapital pour lannen 2019 i konm swivan:

- Rekonstriksyon lekol La Rosiere Primer SR 15.0 milyon
- Dezyenm lekol primer Ile Perseverance SR 15.1 milyon
- Reabilitasyon lekol primer Anse Royale SR 6.8 milyon
- Reabilitasyon lekol Belonie Segonder SR 8 milyon
- Reabilitasyon lekol Grand Anse Pralen Segonder SR 2.5 milyon
- Rekonstriksyon lekol La Digue pou konmans pandan lannen 2019 e en povizyon SR 5 milyon in ganny mete dan bidze 2019
- Konstriksyon en nouvo lekol pour letid biznes ek *Arts & Design*, SR 18.9 milyon. Sa proze pe ganny finanse par en don sorti kot Gouvernman Sinwan.
- Renovasyon *Youth Hostel* Anse Royale SR 4 milyon.

Msye Spiker, mon osi anvi fer resorti ki SR 12.4 milyon in ganny prevwar, koman premye faz lagreman *Small Development Projects* ki'n ganny sinyen ant Gouvernman Lenn ek Sesel, lo en total SR 35 milyon. Sa lagreman ti sinyen pandan vizit Leta Prezidan Danny Faure, dan Lenn, e bann proze ki pou ganny sa finansman i:

- Travay renovasyon lo lekol Anse Boileau Segonder SR 2 milyon
- Travay renovasyon lo lekol Segonder English River SR 2 milyon
- Travay renovasyon lo lekol Grand Anse Praslin Primer SR 0.9 milyon
- Travay renovasyon lo lekol Mont Fleuri Segonder SR 2.5 milyon
- Travay renovasyon lo lekol primer Plaisance SR 2 milyon
- En provizyon SR 3 milyon in ganny prevwar pour aste fil metalik pour bar bann lekol leta.

#### 4.3.2.2 Lasante

Dan sekter lasante, priyorite ozordi se pour address bann maladi transmisib ek non-transmisib ki pe ravaz nou pei. Lepatit C, maladi kardiyovaskiler, dyabet, kanser i zis detrwa legzanp. Nou pou selman kapab fer fas avek sa bann maladi si nou entansifye nou bann program prevansyon pour sanz nou stil lavi, si nou amelyor kalite ek kantite nou resours imen e si nou kontinyen investir dan modernizasyon nou sistenm lasante lo tou nivo.

Msye Spiker, en total SR 1,024.5 milyon pour sekter Lasante an 2019. Laplipar depans pour sa sekter i anba Prodwi e Servis avek en total SR 460.8 milyon, ki reprezant 45% son depans total. Sa i reprezant 16% depans total Gouvernman anba Prodwi e Servis. Msye Spiker, 72% anba Prodwi e Servis i depans anba sa bann program:

- Depans lo provizyon drog medikal SR 53.1 milyon
- Depans lo provizyon vaksen SR 3.8 milyon
- Depans lo provizyon laboratwar SR 20.8 milyon
- *Radiology* SR 6 milyon
- Emodyaliz SR 55 milyon
- *Entomology* SR 57.9 milyon
- Depans lo lezot provizyon medikal ek laboratwar SR 7.2 milyon
- Tretman spesyalize aletranze SR 40.6 milyon
- Lokasyon lakaz pour bann travayer etranze dan domenn lasante SR 27.6 milyon
- Provizyon servis sekirite SR 16.0 milyon
- Provizyon servis netwayaz SR 5.3 milyon
- Provizyon manze ek rasyon SR 26.1 milyon
- Depans lo servis lave SR 7.0 milyon
- Formasyon bann profesyonnel lasante SR 5.3 milyon

Plan pour investir dan en sistenm lenformasyon pour lasante ki pe kout bidze gouvernman plizyer milyon rounpi, pe progrese dapre lekspektasyon. Nou ekspekte vwar lansman sa proze dan bann mwan ki pe vini e nou pou kontinye investir ladan an 2019. Bon lenformasyon dan sekter lasante a ed sa sekter vin pli efektif dan fason ki i zer bann resours e dan lafason ki i adres bann size

prevansyon ek tretman maladi. Sa proze in ganny met lo tennder, e en total SR 36.6 milyon in ganny prevwar pour li an 2019.

Msye Spiker, proze Master Plan Lopital i an progre. En total SR 45.7 milyon ek SR 10.6 milyon in ganny prevwar anba Lazans Swen Lasante ek Lotorite Lasante Piblik respektivman pour lezot proze kapital. Provizyon mazer dan bidze 2019 i konm swivan:

- Konversyon Sant dyagnostik an en laboratwar klinik SR 5 milyon
- Konstriksyon Lopital Logan, La Digue SR 5.6 milyon
- Konstriksyon Sant Lasante Baie Lazare SR 5 milyon
- Renovasyon lopital Baie Ste Anne SR 1.5 milyon
- Konstriksyon en nouvo younit *Outpatients* Anse Royale SR 2 milyon
- Konstriksyon en younit izolasyon SR 7 milyon
- Konstriksyon en Laboratwar Lasante Piblik SR 3.6 milyon
- Depans pour aste lanbilans SR 3.3 milyon

#### 4.3.2.3 Lagrikiltir

Sekter Lagrikiltir i enn bann pilye pli enportan nou lekonomi. I annan serten mezir ki'n ganny pran okour pandan bann lannen, me sa bann mezir pa'n neserman vize ver logmantasyon prodiksyon lokal. Msye Spiker, SR 115.9 milyon in ganny prevwar dan bidze 2019 budget pour sekter lagrikiltir. Minister responsab pour lagrikiltir in anons nouvo linisyativ ki form parti en plan konpreansif pour lagrikiltir.

Msye Spiker, en proze kle ki'n konplete an 2018 i en nouvo sant dyagnostik pour lagrikiltir, Grand Anse Mahe. Sa sant i ekipe avek divers lekipman spesyalize pour fasilite resers lo plant, later ek zannimo, e pour detekte maladi ek bann pest ki afekte sekter lagrikiltir, ki dan long term, i kapab kree en lenpakt lo lekonomi pei.

Sa sant dyagnostik i konpri plizyer laboratwar ki pou annan diferan fonksyon tel ki resers lo zensek, bakteri, parazit, bann flouid organik, ensi ki biolozi molekiler.

Konmela, sekter lagrikiltir pe benefisyete atraver plizyer skim, tel ki konsesyon taks lo lenportasyon lekipman. Me bann prodikter pa pe neserman ganny okenn lankourazman kot i konsern lenvestisman ki zot kontinyelman oblize fer dan prodiksyon lavyann poul, espesyalman kot i konsern manze poul. Alor, fermye i a komans ganny en lasistans pour redwir zot kou prodiksyon.

- i. Konsesyon SR 4 lo sak kilo poul ki egziste konmela pou reste parey. Pri ki fermye pe ganny sarze ek labatwar i aktyelman SR 7 lo sak kilo poul ki ganny touye.
- ii. Adisyonnelman, fermye pou resevwar en konsesyon SR 2.30 lo sak kilo poul pou asiste zot ek pri manze poul. I en fe ki manze zannimo i fer 65% depans total bann fermye.

Dan menm loptik, prodiksyon lavyann koson pe fer fas avek menm problemm depi 2008. Ziska 2007, nou ti pe prodwir plis ki 50% nou konsomasyon lavyann koson. Sa in redwir konsiderableman apre 2007, e ozordi nou pe prodwir zis apepre 30% nou konsomasyon. Sekter lagrikiltir pe prodwir zis 429 tonn konpare ek demann total ki 1,562 tonn, savedir 27%. I annan 52 prodikter lavyann koson ki annan laysenns. Minister lagrikiltir pou fer en evalyasyon lo zesyon bann laferm ki egziste konmela pour asire ki sa target 50% prodiksyon lavyann koson i ganny realize dan sa prosen trwa-z-an.

- i. Fermye ki annan difikilte pou ganny apele e tonm dakor lo en plan.
- ii. Gouvernman pou rebran bann laferm ki'n tonm dan labandon.
- iii. Dapre kalkilasyon, prodikter lavyann koson i ganny zis 4.10 pousan lo profi total. Minister i krwar ki en profi 15% i pli rezonnab. Pour atenn sa pousantaz, Gouvernman pou pran sa bann mezir swivan:
  - Mentenir en lasistans SR 200 pour sak koson ki ganny touye kot labatwar.
  - Vi ki pli gro depans dan prodiksyon koson i al dan manze, apepre 65%, Gouvernman pou donn en lasistans SR 6.50 lo sak kilo koson ki fermye i prodwi. Sa i ekivalan 15% pri manze.

Praslin osi pou benefisyé avek en labatwar pour lavyann rouz, ki pou kout gouvernman SR 2.5 milyon.

Kondisyon kot sa labatwar aktyel i ladan i koz fermye bokou difikilte. Zot pa kapab penetre serten marse aköz bann defayans sa labatwar. Gouvernman pou osi kontinyen ek son plan pour konstrir en labatwar santral Montagne Posee pour tou kalite lavyann. Finansman sa proze lo en kou SR 15 milyon in ganny aprouve pou finanse par Gouvernman e fon Linyon Eropéen pou fer provizyon lekiman a en kou €180,000.

Minister pou fer en kanpanny agresif pour servi bann greenhouse tropikal pour prodiksyon legim. Sa kalite metod prodiksyon in deza prouv son lekor e fermye i a kapab zouir apepre menm to prodiksyon pandan lannen antye. Kou pour konstrir en greenhouse 500 met kare i SR 200,000. Adisyonnelman, Minister in idantifye 100 laferm potansyel pour konstrir bann shade house dan limedya, e sa i a permet en logmantasyon dan prodiksyon.

Msye Spiker, Gouvernman in konstate ki pour li kapab atenn sa bann lobzektif, i bezwen anmenn nouvo teknolozi, par egzanp, metod idroponik. En evalyasyon in ganny fer pour etabli de sa fasilite. Enn pe aktyelman ganny enstale kot sant resers Anse Boileau pour fer resers.

Lazans Lagrikiltir Sesel pou asire ki kalite ek kantite lekiman ek lezot provizyon pour lagrikiltir i reste konsistan, dapre bezwen fermye. Sa pou neselit en amelyorasyon dan bann lenfrastriktir ki egziste tel ki stor ek bann landrwa kot i vann prodwi.

Msye Spiker, sa bann proze swivan pou ganny finanse anba Proze Kapital dan bidze 2019 pour sekter lagrikiltir:

- Konstriksyon en batiman pour met zannimo an karantenn, SR 3 milyon
- Konstriksyon en fasilite resers Anse Boileau SR 4.5 milyon
- Proze anba Trust Fund pour elevaz zannimo, SR 17.6 milyon

Adisyonnelman, en sonm SR 3 milyon in ganny prevwar dan bidze 2019, ensi ki SR 17 milyon sorti dan fon SBFA, pou ganny mete dan Labank Devlopman koman Fon Devlopman Lagrikiltir.

Msye Spiker, nou'n deza anonse ki sa fre GOP SR 500 par mwan pou vin SR 250 par mwan pour sekter lagrikiltir.

Msye Spiker, okenn plan pa pou ganny realize san sa resours pli enportan, resours imen, resers ek devlopman. Lenstiti Lagrikiltir Sesel i en nouvo linisyativ. Konmela, Lenstiti pour Lagrikiltir ek

Ortikiltir i form zis bann mannev lagrikiltir. Sa i rezon aköz i pa'n atir bann etidyan pli doue. Sa nouvo lenstiti lagrikiltir pou annan sa bann lobzektif swivan:

- i. Form bann etidyan dan divers domenn lagrikiltir tel ki prodiksyon fri ek legim, elevaz zannimo, ortikiltir ek zesyon laferm.
- ii. Etidyan i ava ganny ekipe pour etidye lo nivo iniversiter.
- iii. Fer resers, an vi ki Seksyon Resers aktyel dan Lazans Lagrikiltir pou form parti sa lenstiti.
- iv. Tou teknik prodiksyon agrikol tel ki metod idroponik, tropikal greenhouse ek lezot ankor pou ganny montre.
- v. Sa lenstiti pou benefisye ek lezot sipor enternasyonal ki sekter lagrikiltir pe benefisye konmela.
- vi. Fon pour sa lenstiti i deza disponib anba en lon 3.7 milyon dolar ameriken ki Gouvernman Kuwait in donn Sesel pour en tel konstriksyon.

#### **4.3.2.4 Litolizayon Later ek Labita**

An liyn avek komitman governman pou fer lozman vinn pli aksesib avek tou kous popilasyon, sa bidze pe fer provision pour non pa zis plis lakaz e lenfrasriktir pour deservi bann morso kare later me osi pou met plis resours a dispozisyon sa Minister, ki enkli nouvo scheme of service pour bann travayer teknik kin konmans enplimante depi 2018. Sa i konplimant travay ki sa minister inn fer e i ankor pe fer, pour ki tou son bann polisi i vinn pli transparan e alor anmenn sa konfor ki sa bann resours finansyel ki pei i met a dispozisyon sa Minister, i ganny byen zere pour ki son lobsektif i kapab ganny akonpli.

Msye Spiker, en total SR 161.4 milyon in ganny prevwar dan bidze 2019 pour bann diferan proze later ek lakaz. Pandan 2017, PMC in siny en lón SR 150 milyon avek Fon Pansyon e i ekspekte lev ankor fon ziska SR 200 milyon lo marse finansyel avan lannen fini. Sa i ava asire ki target vizavi lakaz ek later i a ganny atenn dan sa prosen trwa-z-an. Gouvernman i ekspekte delivre 143 ek 72 morso later an 2019 ek 2020 respektivman, sorti dan sa fon ki'n mon'n dekri. Sa i enkli osi 406 ek 32 lakaz an 2019 ek 2020 respektivman.

Msye Spiker, Gouvernman pe get dan diferan opsyon pour asire ki plis lakaz i ganny konstrir dan sa prosen si-z-an. Dan sa proses, gouvernman in konmans diskisyon avek Gouvernman Lenn pour kreasyon en striktir spesyal pour konstriksyon 3,000 lakaz. Sa striktir spesyal (*special purpose vehicle*) i a ganny kree anba PMC. Kou estimen pour sa proze i SR 3,026 milyon. Finansman Gouvernman Lenn pou dan laform lón ek don. Pou annan en peryod gras 5an avan repeyman sa lón i komanse. Sa striktir spesyal pou pey sa lón san lenterferans gouvernman. Nou pe ekspekte 558 ek 506 lakaz i ganny konplete an 2020 e 2021 resektivman.

Msye Spiker, sa don SR 102 milyon ki Gouvernman Sinwan in donn nou, ki nou'n anonse pli boner sa lannen, pou osi ganny servi pour bann proze lakaz.



#### **4.3.2.5 Gouvernman Lokal**

Msye Spiker, SR 57 milyon ek SR 52.1 milyon in ganny prevwar pour Gouvernman Lokal anba Prodwi e Servis ek Proze Kapital respektivman. SR 18.8 milyon ek SR 6.9 milyon dan bidze 2019 anba prodwi e servis pou servi pour pey servis sekirite ek servis menntenens. Adisyonnelman, SR 4.2 milyon in ganny prevwar pour diferan aktivite ek programm distrik dan Gouvernman Lokal konm swivan;

- i. SR1.2 milyon pour skim Animater: Sa skim i annan pour bi, idantifye bann dimoun ki enterese dan devlopman programm spesifik lo nivo lokal pour benefis lakominote.
- ii. SR 3 milyon pour aktivite desantralize: Anmenn plis aktivite ek levennman dan kominote an partenarya avek lezot lazans.

Msye Spiker, an Zilyet 2018, plizyer konsey rezyonal in ganny lanse. SR 4.6 milyon in ganny prevwar dan bidze 2019 pour pey en alawenns mansyel sa set tyermenn konsey, ek karande konseye, ensi ki SR 772,464 pour anploy set asistan lofis sinyor.

Proze mazer anba Proze Kapital i konm swivan:

- SR 30 milyon pour pti proze distrik
- SR 5 milyon pour agrandi Biro Ladministrasyon distrik pour enkorpor bann sant rezyonal
- SR 5 milyon pour amelyor lezot biro ladministrasyon distrik

Msye Spiker, fodre note ki en total SR 11.6 milyon in ganny prevwar pour sorti dan sa SR 35 milyon dan premye faz Devlopman Pti Proze ki Gouvernman Lenn pe finanse. Sa proze pou komans tar an 2018. Dan dezyenm faz proze, ki pou komans dan premye kar 2019, en total SR 35 milyon proze pou'n ganny finanse. Parmi sa bann proze i konstriksyon en sant deker lo Ile Perseverance.

#### **4.3.2.6 Zafer Lafanmir ek Devlopman Sosyal**

Okour bann lannen, gouvernman in tenir son promes anver lepep pour asir en bon ledikasyon, bon lasante, e en bon standar lavi. Sepandan, nou bezwen vwar sekter sosyal dan en lot perspektiv.

Bann defi sosyal ki nou fer fas avek konmela i annan plizyer dimansyon. Zot arive, pa aköz move ledikasyon oubyen move swen lasante, me plito aköz bann divers tandans sib-kiltirel ki pli ale pe detri nou fabrik sosyal. Parey plen lezot pei, Sesel in eksperyans lerozyon son bann pilye tradisyonnel e sosyal.

Nou konnen ki dapre dernyen resansman, 75% bann lakour i annan 4 ou mwens manm fanmir. Lekel ki okip bann zanfan ler bann paran, sirtou paran tousel, pe travay oubyen i deplase dan lakour? Se la kot nou bezwen met anplas bann program ki pou donn zanfan loportinite pour grandi, olye ki zot detri zot lekor.

Nou fason panse i vize ver bann stratezi proaktiv e prevantiv, olye ki pour adres kriz ler in fini arive. Sa nouvo fason i anmenn sanzman sosyal. Lanvlop ki'n ganny propoze pour sekter sosyal i reflekte bann program ek servis ki sak minister in enkorpor dan zot plan stratezik. I annan en bezwen pour sa sekter annan en lapros pli kordinen ler i pe adres bann fenomenn ki afekte nou sosyete ek nou bann fanmir, an metan plis resours dan prevansyon ek programm efektif.

Gouvernman i rekonnèt bezwen pour ogmant lakantite travayer sosyal kalifye, konseye sosyal, e lezot domenn psikososyal, pour travay lo bann program ki target bann ki pli vilnerab sosyalman, e ed zot pour vin pli aktiv ekonomikman e zeneralman pli produktiv dan lasosyete. Revizyon skim servis i en mezir ki'n ganny pran pour adres retansyon travayer e amelyor reminerasyon.

Gouvernman i rekonnèt nesosite pour investir konsiderableman dan program sosyal ki kapab fer en diferans bann lenfrastruktir ek servis apropiye. Nou vizyon, se pour vwar en sekter sosyal ki performan, afen ki nou a kapab vin en pei ki kree lanplwa ek loportinite ekonomik pour laplipar nou bann etidyan ki fini lekol, ensi ki dimoun ki pe rod travay, olye ki depan lo travayer etranze.

Msye Spiker, en lot defi ki Sesel pe fer fas avek se nou demografi nou popilasyon. A ler aktyel, 22.4% nou popilasyon i par anba 15an e 8.1% i par lao 65 an. Me dan ankor 30an, sa pou vin lenvers, kot 16.8% nou popilasyon pou anba 15an, e 19.9% pou par lao 65an. I annan en kou finansyel ki al avek sa kalite demografi, e nou bezwen fer sir ki nou met anplas bann polisi apropiye pour asire ki nou pei i kapab sirmont sa defi.

Msye Spiker, "*Maison Troisième Age*" ti enn bann rekomandasyon ki lasosyasyon Trwazyen Az in fer. Gouvernman in finaliz sa konsepsyon avek bann sitwayen Trwazyenm Az ek bann partener dan Prive. Sa proze pou komans an 2020 e i pou sitye Ile Perseverance. Tou bann kontribisyon CSR sorti dan bann lantrepriz piblik pou ganny servi pour konstruksyon sa fasilite. Nou ekspekte ki kou total sa proze pou ariv apepre SR 22.7 milyon. Sa proze, kan i a'n konplete, pou finans son lekor, dapre son plan komersyal.

#### **4.3.2.7 Lazenes ek Sport**

Msye Spiker, avek 34% nou popilasyon ki anba 30an, nou bezwen port bokou latansyon lo nou lazenes. Bidze pour lazenes i epariye parmi diferan minister, departman ek lazans. Malgre ki Konsey Nasyonal Lazenes i lorgann prensipal ki enplimant polisi nasyonal pour lazenes ki'n fek ganny revize, emansipasyon lazenes i reste nou target prensipal pour lannen 2019. SR 2 milyon in ganny prevwar pour bann diferan program lazenes an 2019.

Sport in anzandre dan kiltir Sesel koman en fason pour viv an bonn sante e devlop bann abilite fizik e sportif pour devlopman personnel. Msye Spiker, pour asire ki sa i arive, pou annan bokou lanfaz an 2019, lo desantralizasyon aktivite sportif e anmenn plis aktivite dan distrik ek rezyon, pour benefis lapopilasyon.

Msye Spiker, nou tou nou konnen ki bon performans nou bann atlet i enspir lafyerte ek linite parmi nou pep. Gouvernman i donk bezwen investir dan preparasyon ek partisipasyon Tim Sesel dan Zwe Losean Endyen ki pou fer Moris an 2019. Pandan 2018, tou kontribisyon CSR sorti dan lantrepriz piblik ti ganny servi pour finans proze lakaz. Pandan 2019, menm koleksyon pou ganny fer e pou ganny servi dan preparasyon nou bann atlet pour Zwe Losean Endyen. En total SR 24 milyon pe ganny antisipe pour preparasyon ek partisipasyon Zwe Losean Endyen. Sa i a konplemant sa SR 10 milyon ki ti'n prevwar dan bidze 2018. Adisyonnelman, SR 4.5 milyon in ganny bidzete pour *All Africa Games* an 2019.

Msye Spiker, Gouvernman pou kontinyen siport federasyon sport ek bann klib sportif atraver en bidze SR 3.2 milyon.

#### **4.3.2.8 Sekirite Nasyonal**

Departman Lapolis in ganny en bidze SR 405 milyon. Msye Spiker, Gouvernman pou finans en *Headquarters* Lapolis Ile Du Port avek lasistans Gouvernman Lenn. Sa fasilite pou anploy 100 dimoun e i pou enkli laboratwar *Forensic*. Adisyonneman, bidze 2019 in prevwar en alokasyon pour Proze Kapital, konm swivan;

- Renovasyon kordgard La Digue SR 3.5 milyon
- Amelyorasyon lezot kordgard SR 2.1 milyon
- En nouvo Lakademi Lapolis SR 1.1 milyon

An 2018, depans ti ganny fer pour lekipman *fingerprint*, kemikal ek lekipman pour laboratwar deteksyon krim.

Msye Spiker, nou pti leta zil i fer fas avek bokou defi vizavi devlopman soutenab, gras a en lanvironnman ki son sekirite i frazil. Si an rezilta trafik drog, aktivite lapes ki ilegal, piratri, ek lezot aktivite illegal. Tousala i afekte nou lekonomi dan en fason advers. Vi ki sa bann menas i bann ki pa konvansyonnel, Departman Ladefans i rekonmande ki zefor nasyonal i ganny fer an sinerzi ek *SMSA*, *SCAA*, *SFA*, Lapolis, ek Minister Lasante. Departman Ladefans pou resevwar en alokasyon SR 316.3 milyon dan bidze 2019.

Msye Spiker, en nouvo proze ki Gouvernman pou komanse an 2019 i sistenm paspor biometrik. Sistenm aktyel ki servi metod *Passport Issuance System* in montre siny ki sa sistenm in vin demode. Laplipar pei in fini oubyen i dan proses pe transfer lo sistenm paspor elektronik. I ekspekte ki tranzisyon ver paspor elektronik pour sir sekirite transfrontyer, pou vin en rekonmandasyon mandatwar ICAO (Lorganizasyon Enternasyonal Laviasyon Sivil). Se ensi ki Departman Imigrasyon pou komans devlop en nouvo sistenm paspor pour Sesel ki pou amelyor bann detay sekirite e ki pou osi konpri en *chip* ki stor data biometrik dapre standar ICAO. Provizyon bidze pour 2019 i SR 16.5 milyon pour sa proze.

#### **4.3.2.9 Biro Prokirer Zeneral**

SR 33 milyon in ganny prevwar pour Biro Prokirer Zeneral pour lannen 2019. Sa i en logmantasyon konsiderab konpare ek SR 25.4 milyon Bidze Revize 2018 e SR 19.1 milyon dan depans aktyel bidze 2017. Biro Prokirer Zeneral in ganny akorde finansman neseseur pour fer 10 rekritman adisyonneman dan domenn redaksyon, prosekisyon ek litigasyon. Msye Spiker, Gouvernman pou resevwar en don ek Gouvernman Lenn pour konstrikisyon en nouvo batiman pour biro Prokirer Zeneral lo Ile du Port. Sa batiman pou mezir 4,157 met kare e sa i a permet Biro Prokirer Zeneral annan sifizaman lespas pour son bann bezwen fitir, e osi sa lokasyon i pli konvenyan vi ki i pou pli pros ek batiman Lakour, ki a permet son fonksyonman vin pli efikas.

#### **4.3.2.10 Bann Lotorite Apwentman Konstitisyonnèl ek bann Antite Legal**

Msye Spiker, en total SR 172.3 milyon in ganny prevwar pour bann lotorite ki'n ganny lapwentman konstitisyonnèl dan bidze 2019 konpare ek SR 146.4 milyon dan Bidze Revize 2018 e SR 119.4 milyon pour depans aktyel dan bidze 2017. Alokasyon pou konm swivan:

- Zidisyer SR 94.5 milyon
- Lezislativ SR 43.1 milyon
- Biro Oditer Zeneral SR 20.5 milyon
- Biro *Ombudsman* SR 3.7 milyon
- Biro Bord Lapel Servis Piblik SR 1 milyon
- Lotorite Lapwentman Konstitisyonnèl SR 2.1 milyon
- Komisyon Elektoral SR 7.5 milyon

Msye Spiker, SR 1 milyon in ganny prevwar pour Komisyon Drwa Imen. Komisyon Anti-Koripsyon in ganny akorde SR 14.2 milyon dan bidze 2019 konpare ek SR 12.3 milyon dan Bidze Revize 2018 ek SR 7.0 milyon pour depans aktyel dan bidze 2017.

### **5. DEVLOPMAN DAN BANN SEKTER KLE**

#### **5.1 Sekter Lanvironnman ek Lenerzi**

Proteksyon nou lanvironnman natirel i reste en priyorite nou pei. Atraver sa bidze, gouvènmman pou investir SR 238.8 milyon dan Lazans pour Zesyon Salte ek Lanbelisman dan program pou kit Sesel prop atraver bann nouvo kontra netwayaz e osi kontra anmas salte kot bokou plis kontrakter pou ganny sans partisipe. Anliny avek nou polisi zesyon salte, bann aktivite resiklaz e osi bann lenvestisman dan lalit kont bann prodwi plastik pou ganny ankouraze.

Gouvènmman pou kontinyen an 2019 avek son bann mezir kont litilizasyon serten prodwi plastik, par egzanp konmansman le premye zanvyè 2019, i pou annan en bann lo lenportasyon ek litilizasyon bann kalimen (strò) plastik. Ver milye 2019, program kot dimoun pou kapab rann bann boutey an ver pour 1 rounpi pou konmanse. Bonner an 2019, gouvènmman i annan lentansyon lans en lapeldof pour konpanyen lokal e enternasyonal dan transformasyon salte an lenerzi kot salte i ganny brile pour prodwir lenerzi.

Koman en pti leta zil anvwa devlopman, Sesel in deza anbank lo en semen pour ankouraz prodiksyon lenerzi renouvlab, an vi son devlopman dirab. En linisyativ enportan pour fasilite sa prosesis i formilasyon ek ladopsyon Lakt Lenerzi. Sa lakt in kree en marse pli dinamik pour stimil lefikasite lenerzi e i ankouraz lenportasyon bann akseswar pli efikas dan Sesel. Sa in permet sekter prive pour partisip plenman dan prodiksyon ek distribisyon lenerzi sen e renouvlab. Nenport ki endividi i kapab prodwi son prop elektrisite an servan teknolozi lenerzi renouvlab.

Lenerzi soler i ofer en sours lenerzi ki sen, ki adapte ek nenport klima, e ki enfini. Sa i ofer nou pep sekirite lenerzi e i kapab amelyor zot lavi. Sesel in alor anbank lo en program lenplimantasyon serye pour pou ed nou atenn nou target pour prodwir 5% lenerzi renouvlab ver 2020 e 15% ver 2030.

Pour atenn sa bann target, nou'n lans sa bann linisyativ tre enportan an 2018 e pou kontinyen an 2019:

1. **Programm 'Smart Energy' dan lespas piblik**, ki Gouvernman Lenn in donn US\$3.24 milyon pour lenstalasyon bann panel soler PV lo twa lakaz. Gouvernman pe donn legzanp atraver lenstalasyon panel soler lo twa State House, ki konpri Biro Prezidan, e osi kot batiman Lasanble Nasyonal, e Palais de Justice.
2. Programm '**SMART Energy dan lakour ek biznes**' in ganny lanse kot PUC in met de kontra lo tennder pour konstrir premye de laferm soler lo Ile Romainville. En laferm soler 5MW PV pou finanse par IRENA ek Fon Devlopman Abu Dhabi. Adisyonnelman, en kontra in ganny akorde ek en lakonpanyen Endyen an Zanvye 2018, pour en laferm soler *1 Megawatt solar photo voltaic democratisation farm*. Sa osi pe ganny finanse par sa don zenere 3.4 milyon dolar Ameriken, sorti kot gouvernman Lenn. Sa proze i a donn lenerzi gratwit 500 fanmir Seselwa ki konmela pe ganny lasistans ek gouvernman.

Sesel pe fer plan pour alim son rezo semen avek bann lalimyer LED 10,000 lalimyer. An plis, pou bezwen ankor apepre 5,000 a 10,000 lalimyer pour ranplas bann lalimyer mwen efikas ki nou annan konmela.

Sekter piblik ek batiman gouvernman i servi 4% elektrisite ki ganny prodwi lokalman. Gouvernman in deside pour enstal bann younit PV a en kapasite 2.2 MW lo 22 batiman piblik, pour ogmant portfey lenerzi renouvlab.

Sa de PV plant soler 1.0 MW ki pou enstale lo Praslin ek La Digue pou ganny fasilite stokaz lenerzi an ka sanzman dan zenerasyon lenerzi soler, e fer distribisyon kouran vin pli soupl.

Msye. Spiker, Fondasyon Zil Sesel (SIF), ti enstal PV lo zil Aldabra 7 an pase. Le premye Novanm 2018, Prezidan ti lans proze lenerzi renouvlab lo zil Alphonse. Sa proze i en teknolozi modern ki pe fer zil Alphonse prodwir 90% son lenerzi ki i bezwen pandan en zour avek lenerzi soler. E sa pe ganny administre par lakonpanyen Zil Sesel (IDC). IDC i annan plan pou anmenn menm proze lo lezot zil parey Farquhar, Desroches e Astove.

PUC pou investir dan plizyer proze mazer an 2019, e dan mwayen term, konm swivan;

- De zenerater 8MW kot stasyon lenerzi Roche Caiman
- 33KV Network Ile Du Port
- Stasyon Baie Ste Anne
- Provizyon delo ek proze lo Mahe, Praslin ek La Digue
- Proze desarz.

## 5.2 Sekter Lapes

Msye Spiker, Lotorite Lapes Sesel pou ganny renonmen e i pou fonksyonnan koman en lenstitisyon otonom a parti le premye Zanvye 2019. Sa antite pou pey Gouvernman *dividend* ver lafen 2019.

Konstriksyon in komanse lo sant resers ek devlopman pour lotorite lapas lo Ile Du Port. In estimen ki sa proze pou kout anviron SR 30 milyon.

Lotorite Lapes pou lans plan sekter akwakiltir e entrodwir regilasyon akwakiltir ki etabli bann kad laysensing ek loportinite lenvestisman pour lenvestisman lokal ek enternasyonal. Adisyonneman, *SFA* pe prevwar en dezyenm staz fasilite pour *Brood-stock Acclimatization Quarantine* e osi en *Fish Hatchery* lo por lapas Providence. Sa fasilite pou osi konpri en kouvez pwason ek lespas lofis e i pou kout €700,000.

Msye Spiker, an 2018, proze devlopman mazer lo por lapas i konpri :

- Konplesyon dezyenm faz lagrandisman por Providence – 200 m lasose an plis, langar, lizin ays ek semen akse.
- Konplesyon bazar ek stor La Digue
- Konstriksyon fasilite pour *process* pwason, ki anmenn valer azoute dan preparasyon ton ek lezot lespes parey kot por lapas Providence ek Ile du port.
- Komansman loperasyon lizin pwason ek bann fasilite pour valer azoute dan kad lapas artizanal ek prodwi pwason.

Adisyonneman, *SFA* pou eksplor potansyel pour devlop en por lapas dedye a lapas ek laliny, ek tou son servis sipor. Kot i konsern Praslin, *SFA* in inisyé proze devlopman pour lenfrastruktir lapas artizanal Baie Ste Anne ek Grand Anse Praslin.

Msye Spiker, i ekspekte ki devlopman bann *value chains* pour prodiksyon fridmer i a ankouraz en krwasans a long term, kree plis travay e ogmant sekirite alimanter. Sepandan, nou bezwen mannye sa bann ekspansyon ek diversifikasyon bann *value chains* pour ki zot anliny ek bon gouvènan, pour anpese ki demann ek pri i sanze, e ki an retour i kapab met presyon lo resours ek lekosistenm maren. Pour atenn sa nivo konplemantarite, bann kategori lenvestisman dan *value chains* fridmer i depan lo bon lamenzan bann sekter lapas ek bon planifikasyon lespas maren.

Depi 2007, lekspansyon bann fasilite prodiksyon pwason in en pwen fokal. Bann nouvo fasilite Providence ek Bel Ombre in ogmant kapasite pour *process* pwason dan lapas semi endistriyel ek artisanal, ensi ki ouver loportinite pour dil ek *bycatch* bann gro bato ton. Proze devlopman pour en *Cold Store* santral (CCCS) Ile du Port i ava azout plis servis pour triyaz, stokaz ek transportasyon 12,000Mt pwason endistriyel, e ogmant son valer azoute par omwen ±4,800Mt.

### 5.3 Sekter Lanplwa

Msye Spiker, pousantaz dimoun ki napa travay in reste par anba 5% e dan premye kar 2018, i ti 4.2%, parey dan premye kar 2017, kot i ti 4.7%. Fodre note ki mwayenn pousantaz dimoun ki pa travay lo nivo nasyonal an 2017 ti 3.9%, avek plis madanm ki ti san lanplwa (4.0%), konpare ek zonn (3.9%).

Pousantaz lazenes ki san en lanplwa in desann, sorti 12.7% dan premye kar 2017 pour vin 11.3% dan premye kar 2018. Dan dezyenm kar 2018, 448 *graduates* sorti dan bann sant profesyonnel in anrezistre anba *My First Job scheme*, e in ganny plase dan lanplwa. Sa i reprezant 68% lo en total 661 zenn ki'n anrezistre lo sa skim.

Sa Minister in kontinyen met bann zenn ki pe rod lanplwa, me ki napa skil ek leksperyans, lo son *Skills Development Programme*. Depi dezyenm kar 2018, apepre 223 zenn apranti ti aktiv lo sa program, enkli bann group ki'n antre 2016 ek 2018.

Depi dezyenm kar 2018, ti annan 428 dimoun ki'n anrezistre lo *Unemployment Relief Scheme* (URS). Ladan, 126 in ganny plase dan lanplwa. I annan an tou, 30 lorganizasyon lanplwa ki'n anrezistre anba URS.

Msye Spiker, nou defi i ankor reste krwasans ekonomik vizavi lakantite dimoun ki annan lo marse lanplwa. Gouvernman i a asire ki Seselwa i ganny skil nesese pour ki zot a kapab ranplas bann travayer etranze otan ki posib. Mon pran sa loportinite pour fer rapel bann anplwayer, lavantaz taks ki egziste ozordi anba bann lalwa taks si zot ofer formasyon zot bann anplwaye.

#### **5.4 Klima Lenvestisman e Pti ek Mwayen Lantrepriz**

Msye Spiker, bann pti ek mwayen lantrepriz i reprezant plis ki 80% bann biznes dan Sesel, dan divers sektor tel ki servis *Child Minding*, *Creative Industries* ek lendistri *Light Manufacturing*. Sa bann aktivite i bann sours lanplwa mazer dan nenport ki lekonomi modern. Gouvernman in toultan met lanfaz lo devlopman fasilite pour permet sa bann pti lantrepriz devlope atraver kreasyon bann lazans, fasilite, skim finansman, pour nonm enn de.

Pour lannen 2018 sa bann linisyativ swivan in ganny entrodwir dan sa sektor:

- *Letablisman Enterprise Seychelles Agency (ESA) pour ranplas SENPA*; ESA pe agrandi e elev nivo responsabilite ek fonksyon pour kapab fer fas avek legzisans ek realite bann pti ek mwayen lantrepriz, ensi ki donn zot sipor enstitisyonnell.
- Provizyon formasyon biznes pour ankor 300 antreprenner; sa in posib selman atraver en kolaborasyon ekstraordiner ant Labank Devlopman Afriken, SENPA ek Lenstiti Guy Morel. I enportan pour note ki ziska prezan, sa linisyativ in anmenn nou lo en total 800 antreprenner ki'n ganny formen. Lanfaz pou kontinyen ganny mete, atraver polisi endistriyalizasyon, pour ogmant kapasite e ankouraz bann pti ek mwayen lantrepriz pour antre dan aktivite manifaktir oubyen aktivite pli prodiktiv, e pour entegre teknolozi prodiksyon pour diversifye nou lekonomi. Sa i ava ogmant pousantaz domenn manifaktir dan Prodwi Domestik Brit.

Msye Spiker, Gouvernman pe kontinyen son zefor pour kree nouvo linisyativ pour bann pti ek mwayen lantrepriz. An 2019, sa bann linisyativ pou enkli :

- Letablisman en *Prompt Payment Policy* ek prozedlwa; bokou biznes, espesyalman bann pti ek mwayen lantrepriz, i rankontre difiklte pour fer zot kliyan pey sa ki zot dwa atan. Retard an repeyman det i met sa bann pti biznes anba bokou presyon finansyel e i met zot soutenabilite an risk. Sa polisi ek prozedlwa i annan pour bi promouvwar bann meyer Pratik dan bann tranzaksyon peyman komersyal, amelyor *cash flow* ant fournir ek konsomater,

e kiltiv disiplin finansyel dan nou koutim repeyman lo nivo nasyonal. Sa prozedlwa pou ganny met devan Lasanble Nasyonan an 2019;

- Lamannman *Seed Capital Grant Scheme*; Swivan en legzésis lobzervasyon ek evalyasyon lanse par Departman Devlopman Lendistri ek Lantreprenarya, sa skim in ganny amelyore pour fer li vin en “walk in” *Seed Capital Grant Scheme*. SR 5 milyon in ganny prevwar pour sa dan bidze 2019.
- Letablisman en sistenm pwen pour alokasyon later pour lizaz endistriyel e komersyal: Sa sistenm pwen i a asir en zesyon later komersyal e endistriyel ki pli organize e pli byen. Sa sistenm i a determin priyorite gouvèrnman e optimiz later koman en resours rar.

Msye Spiker, Gouvèrnman pou akord Lotorite *Industrial Estate* fon nesese pour sa bann lenvestisman swivan;

- SR 8.8 milyon devlopman lenfrastruktir lo Zón 20.
- SR 5 milyon devlopman lenfrastruktir lo Zil Eve
- SR 2.2 milyon amelyorasyon semen dan zón endistriyel.

Pandan 2018, Departman Lenvestisman in fokaliz son latansyon lo *Framework* lenvestisman pour fasilite lenvestisman ek biznes dan pei.

Enn bann pli gran *milestone* sa lannen in lansman Polisi Lenvestisman. Bann prensip ki gouvèrn sa polisi i:

1. Kreasyon en lanvironnman transparan e ki fer li posibil pou atir lenvestisman e fer biznes marse
2. Modernizasyon kad legal pour lenvestisman
3. Laplikasyon bann standar ek meyer pratik enternayonal dan domenn lenvestisman
4. Respe pour lanvironnman ek fabrik sosyokiltirel nou pei

En lot lanfaz enportan Departman Lenvestisman pour sa lannen se zefor ki'n ganny mete pour revwar prosedir ek rekomandasyon ki dimoun i bezwen swiv pour ouver en biznes e fer li marse.

Lentansyon se pour met plis lanfaz lo rol lenvestiser ek loperater pour asire ki fonksyonnman i anliny ek regilasyon. Pour sa kapab arive, i nesese ki dimoun i annan akse avek polisi, lalwa, rekomandasyon ek standar, afen ki zot bann plan i ava anliny avek tousala.

Dan sa loptik, gouvèrnman in relans son komite *High Level Ease of Doing Business* ki ganny prezide par Vis Prezidan ek bann group minis, ensi ki bann reprezantan sekter prive. Sa komite i get plandaksyon bann lazans piblik an kestyon, an relasyon avek sa 11 paramet ki ganny servi dan lendeks *Ease of Doing Business*, ensi ki lezot keksoz ki annan pour fer avek biznes.

Sa departman pe osi angaz bann lorgann regilatwar pour revwar bann prosedir aktyel ki dimoun i bezwen swiv pour ouver en biznes, avek bi pour entrodwir bann prosedir pli senp e direk, e donk rann prosesis ouver en biznes pli senp.



Adisyonneman, Gouvernman, ansanm ek Lasanm Komers, in fer Foronm Biznes Sesel, e rekomandasyon sa foronm in ganny prezante avek Konsey Minis. En komite ki konpri bann reprezantan sorti dan sekter prive in ganny etabli pour asir en swivi etrwat vizavi bann rekomandasyon.

#### **5.4 Lenformasyon Teknolozi ek Kominikasyon**

Mnye Spiker, depi lannen pase nou'n obzerv en logmantasyon lizaz servis teknolozi lenformasyon, espesyalman dan kad servis data lo mobayl ek rezo fiks. Nou'n note ki sa lannen, tou le de operater pe donn servis mobayl 2G, 3G ek 4G plis ki 90% nou popilasyon. Nou'n vwar ankor revizyon dan pri servis broadband ki bann operater i ofer, ki'n donk fer sa servis vin pli abordab, e ogmant son valer ek swa ki kliyan i annan. Sa i en bon siny akoz i montre ki konsomater pe enfliyans marse. Sepandan, nou bezwen fer plis pour asire ki bann konsomater lo saler minimonm pa tro ganny defavorize.

Gouvernman pou kontinyen fasilite devlopman sekter lenformasyon teknolozi ek kominikasyon atraver lentrodiksyon bann polisi ek lezislasyon ki favorab anver konsomater, e atraver enteraksyon avek tou partiprenan dan sa sekter. Gouvernman in fek aprouv en *Communications Tower and Antenna Policy* ki'n deza pran lefe. Sa polisi pou gid lenstalasyon bann lema par bann operater, pour permet partaz sa bann lema avek lezot operater, e reasir piblik vizavi zot konsern an relasyon avek lenstalasyon sa bann lema.

I antisipe ki dan sa bann mwan ki pe vini, regilasyon pour kalite servis dan domenn *broadcasting* ek telekominikasyon pou ganny aplike. Sa regilasyon i determin bann standar minimonm ki bann operater i bezwen obzerve. Pli enportan, i met en lobligasyon lo sa bann operater pour pibliy lenformasyon lo kalite bann servis ki pe ganny ofer ek piblik pour ki konsomater i byen enformen lo kalite servis ki operater i ofer.

Departman ICT e bann operater telekominikasyon mobayl in komans prosedir pour entrodwir *Mobile Number Portability* (MNP). I ekspekte ki lentrodiksyon MNP i a anmenn plis konpetisyon ant bann operater mobayl, ogmant swa konsomater, amelyor servis pour konsomater ek kalite *network*, anmenn inovasyon ek lefikasite, e evantyelman fer servis mobayl vin pli abordab. Adisyonneman, lefet ki *Mobile Number Portability* pe ganny ofer i a konsolid drwa konsomater.

Performans ek devlopman sekter telekominikasyon ek *broadcasting* in posib selman akoz son kadreman lezislativ in permet li. Nouvo prozedlwa kominikasyon ki pou ranplas lalwa aktyel pour *Broadcasting* ek Telekominikasyon (2000), i dan son dernyen staz redaksyon. Sa lezislasyon i a rann sa sekter ankor pli efikas e ankouraz devlopman ek konpetisyon. I pou osi fer provizyon pour en regilater endependan ki pou separe ek DICT.

Nou ekspekte ki ver lannen 2020, dezyenm kab soumaren i a'n fini enstale. Sinyatir lagreman ek kontra ant sistenm lakonpanyen kab Sesel (SCS) ek bann lakonpanyen Sinwan ki enplike ek sistenm PEACE i vedir ki Sesel i a ganny konekte par en brans sistenm PEACE. Sa sistenm pou vin operasyonnel an 2020. Konektivite avek PEACE i a konplemant konektivite ki sistenm SEAS i donnen (premye kab soumaren). Dezyenm kab soumaren i a asir sekirite nou konektivite enternasyonal e i a redwir okenn lenpakt negativ lo lekonomi ki kapab arive si loperasyon SEAS i

ganny enteronpe (legzanp si en kab i ganny koupe). Kou pour sa dezyenm kab soumaren i 20 milyon dolar. Koman en linisyativ partenaya ant sekter prive ek sekter piblik (PPP), SCS in en sikse, e i aprezan dan en pozisyon pour organiz finansman sa nouvo proze san ki i bezwen ganny rekour ek son bann aksyonner pour okenn lenvestisman oubyen garanti. Bann aksyonner SCS i Gouvernman, Cable and Wireless ek AIRTEL. Fodre note ki sa dezyenm kab soumaren ti enn bann proze lenfrastruktir dan plan stratezik nayonal, ki Prezidan ti idantifye dan son ladres leta lanasyon an 2017. Ozordi, nou kapab konsider sa koman en target ki'n ganny atenn.

Koman parti son linisyativ *E-Government*, sa sekter pe kontinyen met anplas bann mwayen ki pou permet bann sitwayen ek biznes enterakte e fer tranzaksyon ek Gouvernman atraver bann lyen elektronik. Regilasyon ki kouver lizaz sinyatir elektronik ti ganny etabli anba Lalwa Tranzaksyon Elektronik (*Electronic Transaction Act*) e in vin operasyonnel depi Avril 2018. Sa i permet servi sinyatir elektronik ki ganny rekonnet legalman isi Sesel. Anliny avek lizaz peyman elektronik, sa i permet tou tranzaksyon finansyel e ofisyel ganny fer elektronikman, san papye. Prosedir laplikasyon planing i premye prosedir ofisyel ki pe aktyelman servi sa sistenm sinyatir elektronik. Travay pe ganny fer pour anbelir lezot servis elektronik pour ki zot a kapab servi sistenm sinyatir elektronik.

Plizyer lezot nouvo sistenm, ansanm avek bann servis elektronik ki asosye avek zot, pe ganny enplimante, e i ekspekte ki serten sistenm kle tel ki *Collateral Register* ek sistenm *Credit Information* (CIS) i a vin operasyonnel ver lafen lannen. Lobzektif sa lenplimantasyon a bann sistenm se pour fer loperasyon biznes vin pli fasil.

Msye Spiker, lemonn pe antre tre vit dan son katriyenm revolisyon lendistriyel. Sesel i bezwen kree en lanvironnman dinamik ki a asire ki nou annan en lekonomi elektronik ki kapab sibir sanzman dan son lenfrastruktir, regilasyon, konpetans ek finans. Nou bezwen revwar nou prosedir planifikasyon pour asire ki i enkorpor sistenm elektronik dan tou sa ki nou fer. Alors, Msye Spiker, Gouvernm ek sekter prive pou travay ansanm an 2019, pour asire ki nou annan en stratezi lekonomi elektronik anplas

## **5.6. Lekonomi Ble**

Aprè de-z-an preparasyon, Gouvernman in komans enplimant proze *Third South West Indian Ocean Fisheries Governance* ek *Shared Growth Project* (SWIOFish3). Sa proze *SWIOFish3* pe ganny finanse par en lón \$5m ek Labank Mondyal, ek en *grant* \$5.3 m ek GEF. Sa proze pe ed Sesel pour ranforsi son striktir gouvrenans ek polisi pour en tranzisyon anver en lendistri lapes ki dirab e ki annan plis valer.

Msye Spiker, mon fyer pour anonse ki premye *sovereign Blue Bond* dan lemonn in ganny inisyé par nou Gouvernman e i ti lanse le 29 Oktob 2018. Reveni sorti dan sa bond i a servi pour siport lobzektif SWIOFish3. Reveni sa *Blue Bond* (\$15 milyon) i a realiz kapital pour en *Blue Grants Fund* (\$3 milyon) ki a ganny zere par Fon Sesel pour Konservasyon ek Adaptasyon Klima (*Seychelles Conservation and Climate Adaptation Trust - SeyCCAT*) ek en *Blue Investment Fund* (\$12 milyon) ki a ganny zere par Labank Devlopman Sesel. Bann lorganizasyon oubyen endividi ki pou benefisyé ek sa bann lón ek *grant* anba sa fon i enkli peser, distribiter, fabrikater, tou groser

biznes, ensi ki bann lasosyasyon lapes, lazans gouvènmman, lenstitisyon akademik, lorganizasyon non-gouvènmantal ki'n anrezistre lokalman, bann group kominoter, sosyete sivil, ensidswit. Sa bond i kouven en gran varyete aktivite, ki enkli:

- Zesyon bann zòn soutenab lo en baz kominoter, ek lenplimantasyon bann plan zesyon lapes ki enplik kolaborasyon;
- Ladopsyon nouvo teknolozi ek platform pour aksed bann kliyantel e siport bann aktivite sirveyans;
- Ladopsyon bann Pratik lapes soutenab koman bann *incentives* ki *market-based*, atraver bann skim *labeling* ek sertifikasyon;
- Bann servis syantifik ek lozistik pour sekter lapes;
- Restriktirasyon kapasite laflot lapes, par egzanp, pour reamenaz bato pour bann aktivite lapes ki pa tro ganny eksplwate, oubyen pour lezot aktivite tourism;
- Lagrandisman ek devlopman *processing* pwason ek devlopman valer azoute pour bann aktivite derive (legzanp *by-catch* ton);
- Amelyorasyon dan lefikasite lizaz lenerzi ek fason desarz i ganny mannye pour amelyor performans dan *processing* pwason.
- Akwakiltir lo en baz pti ek mwayen.

*Blue Grant Funding* atraver *SEYCCAT* pou konm swivan:

- a) Konsep pti ek mwayen *grant*, ziska SR 100,000
- b) Konsep gro *grant* depi SR 100,000 ziska SR 1 milyon

DBS pou ofer en lón ziska en limit \$ 3 milyon pour okenn proze partikilye a en to lenter 4% e en peryod repeyman ziska 15 an.

### **5.7. Devlopman Sekter Finansyel**

Msye Spiker, Labank Santral in amann Regilasyon Lenstitisyon Finansyel (bann fre ki labank i sarze) depi le 26 Fevriye 2018, parey ti anonse dan Diskour Bidze 2018. Sa lamannman dan sa regilasyon i asire ki:

- Pri maksimonm pour fer prosedir lón pour dimoun ki pe akerrir zot premye lakaz, i SR2,500 pour lón par anba SR 1.5 milyon.
- Pour bann lón parlao SR 1.5 milyon, dimoun ki pe akerrir zot premye lakaz a ganny sarze en maksimonm 0.5% lo balans zot lón.

Adisyonnelman, sa lamannman ti ganny fer pour asire ki bann labank pa enpoz en lenter plis ki 5% par an dan ka bann penalti, e sa lenter i ganny kalkile dapre aryeraz, andeor sa lenter regilye ki sa dimoun i bezwen peye.

Msye Spiker, lakadremman regilatwar sekter servis finansyel pe kontinyen ganny modernize pour asire ki sa sekter i kapab diversifye son servis e ki i reste anliny ek meyer pratik enternasyonal. Sa i enkli travay lo *Base Erosion and Profit Shifting (BEPS)* ek ladopsyon *common reporting standards*.

Evalyasyon Risk Nasyonal kont blansisaz larzan ek finansman terorizm (AML/CFT) ti finalize an Oktob 2017. Sa in fer atraver en evalyasyon mityel par *Financial Action Task Force (FATF)* ki en lorgann rezyonal Sid ek Les Lafrik, kont blansisaz larzan (ESAAMLG), e sa evalyasyon ti konplete an Out 2018. Rapo lo Sesel pou disponib lo ESSAMLG e lo sit web Lotorite Sesel pandan mwan Novanm. Sa rapo i enkli serten rekomandasyon ki a ede pour ranforsi lankadremant regilatwar AML/CFT. An partikilye, en nouvo prozedlwa AML/CFT pou ganny soumet avek Lasanble Nasyonal apre en revy adisyonnèl par diferan parti konsernen, enkli departman legal Fon Moneter Enternasyonal. Sa lalwa i ava etabli en komite nasyonal onivo pour sirvey lenplimantasyon AML/CFT, e en bord endepandan i a ganny kree pour siperviz loperasyon younit *Financial Intelligence (FIU)*. FIU i ava adopte en striktir operayonnèl ki *risk based*, pour gid son aktivite, e lakantite staf ki fer lenspeksyon pou ganny ogmante. Bann lagreman mityel i ava ganny etabli pour amelyor korperasyon lo bann problemn AML/CFT ant sa trwa regilater, Labank Santral (CBS), Servis Lotorite Finansyel (FSA) ek FIU.

An plis ki lansman Stratezi Nasyonal pour Ledikasyon Finansyel, lotorite konsernen in vwar li enportan pour travay lo en feyderout lo nivo nasyonal, avek lobzektif primer, ki tou *stakeholders* i korpere dan en lapros kordinen pour promouvwar lenklizyon finansyel dan Sesel, dan en fason efikas ek efektiv. Bokou lanfaz pe ganny mete lo lizaz efikas bann servis finansyel, enkli bann servis finansyel ki inovativ, rediksyon lizaz peyman larzan likid, akse bann *SMEs* 'avek finans, ek konpetisyon dan sekter finans. Dan sa konteks, Labank Santral i osi annan en bi pour travay an kolaborasyon avek minister responsab pour finans, pour ogmant lefikasite peyman gouvènmant, ensi ki *remittance market*.

Nimerizasyon lekonomi i tre o lo azanda Labank Santral. Labank in an proses pe drafte en plan modernizasyon pour devlop plis lenfrastruktir peyman, ki a permet en pli gran swa metod peyman elektronik e nimerik pour bann kliyan servis finansyel. Sa plan modernizasyon lenfrastruktir peyman i enkli lenplimantasyon en *Central Security Depository*, en *Real Time Gross Settlement* e en *national payment switch*, ki anvizaze komanse an 2019. Labank Santral pe osi kolabor avek minister responsab pour finans pour nimeriz bann peyman gouvènmant, e promouvwar lizaz bann fasilite peyman elektronik dan pei, dan en zefor pour transform an en lekonomi nimerik.

Travay pe kontinyen pour anbelir *Credit Information System* aktyel, e osi pour fer *Credit Information System Act* vin pli koni e pli byen servi. Sa lakt pou fer provizyon pour donn plis letan pour evalye lenformasyon konsènan kredi, afen ki bann labank a kapab deside si i vo lapenn donn en kliyan kredi, e osi ed zot deside konmyen pou sarze pour sa kredi, baze lo degre risk ki annan. Sa proze i ekspekte finalize ver Desanm 2019.

Bann lotorite finansyel in pran an kont ki Teknolozi Finansyel (Fintech) i kapab amelyor devlopman sekter finansyel, espesyalman dan bann domenn ki ganny idantifye dan Plan Devlopman Sekter Finansyel. Laprouvasyon in ganny donner pour en Stratezi Nasyonal *Fintech* ganny formile, avek en lapros kordinen kot i konsèrn son ladopsyon par sekter finansyel *onshore* ek *offshore* dan nou pei, me tout an gardan son bann risk antet. Sa stratezi pou pran an

konsiderasyon, bann linisyativ nasyonal pour nimeriz nou lekonomi, e potansyel ki *Fintech* i annan pour fer en lekonomi nimerize posib. Sa stratezi i ekspekte finalize dan premye 6 mwan 2019.

Labank Santral ek FSA pe lyez avek Biro Prokirer Zeneral pour propaz en lalwa pour proteksyon finansyel konsomater. Sa lalwa pou pare ver lafen 2019. Bi sa lalwa, ek son bann regilasyon asosye, se pour donn bann lotorite konpetan manda pour adres bann konplent konsernan servis finansyel, asire ki bann lenfraksyon kont konsomater i ganny redrese, asire ki konsomater i ganny en tretman zis e ekitab. An konzonksyon avek propagasyon sa lalwa, sa bann lotorite pe osi travay ver letablisman en striktir pour anpes vyolasyon kod kondwit lo marse, ki a an retour, ogmant konfyans konsomater dan bann prodwi ek servis finansyel.

## 5.8. Sekter Transpor

Lotorite Lavyasyon Sivil Sesel pe kontinyen fer progre dan son bann zefor devlopman kapital, anliny avek logmantasyon trafik lo erport enternasyon. Nouvo Terminal Domestik lo Mahe pou ouver pour biznes ver Desanm, apre en lenvestisman SR 87 milyon.

Dan lannen ki pe vini, ankor plis devlopman pou ganny fer lo erport enternasyon, pour amelyor lakantite aktivite ki i kapab mannye. Sa i enplik en lenvestisman SR12 milyon, avek bi pozisyonn nou fasilite anliny avek standar enternasyon pour sekirite lavyasyon, ensi ki pour amelyor leksperyans pasaze. Sa proze pou komans an 2019 e pou kontinyen an 2020.

Msye Spiker, an 2018, Sesel in an bark lo en proze mazer pour agrandi e moderniz por komersyal. Lenfrastruktir por aktyel in vin tro pti pour bann demann komers dan nou pei, e in vin demode vizavi bezwen bann bato konntener pli avanse ki pe sirkil dan Losean Endyen. Por Victoria i bezwen agrandi e modernize pour Sesel reste konpetitiv koman en por ki kapab atir sa nouvo zenerasyon bato kargo.

Bann laranzman finansyel pour proze por ti ganny sinyen an Avril 2018 ant SPA ek en konsortyonm lenstitisyon enternasyon ki pret larzan, pli presizeman, Labank Lenvestisman Eropeen (EIB) (€12.5M), *Agence France de Developpement* (AFD) (€16.5M) ek en *grant* € 5.0M sorti kot Linyon Eropeen. Si tou keksoz i al dapre plan, sa proze i ekspekte konplete an 2022.

Apard sa plan pour agrandi e moderniz por komersyal, SPA i annan plizyer lezot proze kapital ki i'n targete pour enplimante an 2019. Sa i enkli:

- Konstriksyon 150 met lasose pasaze vizavi terminal kargo lo Zil Eve, Praslin, avek en kapasite pour pran kat bato pasaze enteril ek 500 pasaze alafwa. Sa lasose pou osi kapab pran en pti bato krwazyer enteril. Proze pou kout SR 19 milyon e i ekspekte konplete dan milye 2019.
- Pour konplemant sa proze lasose pasaze, en batiman ki pou servi koman terminal pasaze pou ganny konstri a en kou SR 40 milyon. Sa terminal pou kapab pran 500 pasaze alafwa,

e i pou konpri bann fasilite sanniter, biro tiket, fasilite pou okip bagaz ek lezot fasilite esansyel ki pou ganny konstrir.

- An 2018, SPA ti komisyonn konstriksyon de *warehouse* lo Ile Du Port, ki konpri 12 younit an total. Sa de *warehouse* i a konsolid pozisyon Por Victoria koman en sant lozistik pour aktivite lapas endistriyel (lapas ton). Sa bann younit kin kout SR 10 milyon, a servi bann pti ek mwayen antreprenner dan domenn elektro/mekanik profesyonnel lamarin.

Msye Spiker, en total SR 68.1 milyon pou ganny investir dan bann proze lenfrastriktir semen. Enn bann proze mazer i konstriksyon en nouvo semen sorti Pasquere pour al Grand Anse Praslin (atraver La Plaine Holandaise), ki'n ganny estimen a en kou SR 46.5 milyon.

### **5.9. Sekter Tourizm**

Msye Spiker, sekter tourizm i reste pilye prensipal nou lekonomi. Reveni taks ki sa sekter i anmennen i reprezant 31% reveni taks total pei. Departman tourizm pou kontinyen asir kalite dan lendistri tourizm par kontinyelman asiste bann biznes tourizm pour travay pour mentenir bann standar ki alaoter e ofer valer pour larzan atraver sirveyans, lenspeksyon ek kontrol kontinyel, pou tou bann biznes tourizm pour ki sesel i kapab mentenir son pozisyon koman en marse odgam, me osi abordab, ki ava kontinyen kontribye anver lekonomi pei, e ensi kontinyen ede amelyor kalite lavi tou seselwa.

Avek bi etabli bann standar dan sekter akomodasyon, Departman Tourizm in, pandan sa trwa dernyen lannen travay lo en program notasyon pour bann lotel. Sa in enkli devlopman bann kriter, bann vizit konsiltatif, bann lesey pilot dan bann lotel, rankont konsiltatif, latelye e osi redaksyon prozedlwa pour Devplomman Tourizm. Faz inisyal sa program i pres pou fini e atraver bidze 2019, sa Departman, pe prepar li pour lenplimantasyon sa program, ki son bi se pour etabli en pli bon nivo standardizasyon e ogmant profesyonnalizm dan lendistri tourizm.

Program Tourizm Soutenab Sesel (*Seychelles Sustainable Tourism Label*) ki ti ganny inisyé an 2012 in kontinyelman akimil lentere diran bann lannen, avek 17 lotel ki'n ganny sertifye a ler aktyel, ek lezot lotel ki pe travay ver sertifikasyon. Sa program ti ganny rekonnèt enternasyonalman ler i ti ganny rekonnèt lo stati GSTC. Departman Tourizm pou kontinyen travay pandan lannen finansyer 2019 pour mentenir soutenabilite sa sekter atraver logmantasyon bann prodwi sertifye, amelyorasyon vizibilite sa bann prodwi vizavi bann kliyan e piblikasyon bann benefis finansyer ki sa sistenm sertifikasyon i anmennen atraver serten *case-studies* bann lotel sertifye.

Msye Spiker, Gouvernman in reste angaze anver travay marketing ki Bord Tourizm Sesel i antreprann e pour lannen 2019, bidze i prevwar SR 91.7 milyon pour fon marketing, Bord Tourizm Sesel.

### **5.10. Lar, Lakiltir ek Leritaz**

Msye Spiker, lar kiltir ek leritaz in resevwar en total SR 171.2 milyon ki'n distribye parmi bann diferan departman ek lenstitisyon konpare avek selman SR 119.3 milyon pou bidze revize pou

lannen 2018. Sa i demontre gran lenportans sa sekter dan bidze 2019. Sa total i enkli SR 46.2 milyon ouswa 25.8% pour bann proze kapital, e serten sa bann lenvestisman mazer i enkli:

- SR 2.1 milyon pour renovasyon lasal Carnegie.
- SR 1.7 milyon pour renovasyon Théâtre des Palmes.
- SR 16.68 milyon pour renovasyon Bibliotek Nasyonal
- SR 5 milyon pour renovasyon batiman administrative obor annex ex-lakour.
- SR 1 milyon pour renovasyon batiman Konsej Nasyonal pour Lar.
- SR 1.5 milyon pour renovasyon Teat Nasyonal.
- SR 1 milyon pour konstriksyon Batiman administrativ pour Fondasyon Leritaz Sesel.
- SR 3 milyon pour reparasyon twa sant konferans enternasyonal.
- SR 5 milyon pour Stad Lanmizik.
- SR 5.9 milyon pour konstriksyon en nouvo batiman administrative pour Lenstiti Kreol e renovasyon son batiman.

## **6. BIDZE 2019 POUR BANN PROGRAMM SOSYAL**

Dan bidze 2019, gouvènmman pou mentenir son langazman pour finans bann programm sosyal ki vize ver bann dimoun pli vilnerab dan nou sosyete. Bidze pour sa bann programm i enkli:

- SR 40 milyon pour ‘Social Safety Net’ atraver Lazans Proteksyon Sosyal
- SR 240 milyon pour bann Home Carers, ki enkli zot trezyenm mwan saler.
- SR 8.5 milyon pour programm renovasyon lakaz/ sanz twatir pour bann pansyoner atraver Lakonpanyen finansman pour lozman (HFC),
- SR 10 milyon pour Programm Reparasyon Lakaz bann ki pli Vilnerab atraver Lazans Proteksyon Sosyal.
- SR 18 milyon pour programm Sibvansyon Finansman Lozman, e
- SR 4.2 milyon pour bann fon dedye pour bann lekòl.
- SR 6.7 milyon pour skim daycare
- SR 3.2 milyon pour skim foster care

An 2019, Gouvènmman pou osi ofè bidze pour sipòr plizyèr programm finansman pour biznes.

- SR 5 milyon pour programm lanplwa pour bann zenn. (*My First Job Scheme*),
- SR 1 milyon pour Programm Zenn Antreprenèr, (*YES*)
- SR 16 milyon pour sibvansyonn to lèntere lo bann lon ‘SME’ (*SMEs Scheme*)

Msyè Spiker, en sonm SR 17.3 milyon in prevwar pour labours bann etidyan pos–segonder. Sa pou neser pour Gouvènmman kontinyen donn sipòr bann etidyan konm swivan;

- Etidyan premye lannen SR 850 par mwan
- Etidyan dezyenm lannen SR 950 par mwan
- Etidyan trwazyenm lannen SR 1, 050 par mwan

Etidyan Pralen ek Ladig dan bann lenstitisyon pos-segonder i ganny 1,400 par mwan adisyonnèl diran sa 3an letid e SR 200 i ganny tire pour fre bann servis itiliter kot Youth Hostel.

Msye Spiker, SPTC in komans enplimant en nouvo kad travayer depi Zilyet 2018, ki ava annan lanpak signifikatif pandan lannen 2019. An plis, SPTC in komans termin serten son ban servis kontra e pe les sa bann kontra pour bann operater prive. Pandan lannen 2019, Gouvernman pou fer evalyasyon loperasyon SPTC e evalye bann diferan opsyon avek sekter prive pour vwar ki bann domenn servis ki zot kapab antre ladan. Anliny avek sa, en bidze SR 30 milyon in ganny prevwar pour sibvansyon SPTC e SR 28 milyon pour bann konsesyon transpor ki SPTC i fer pour bann etidyan ek dimoun aze.

Biro Sekreterdeta pour soulazman lapovrete i annan manda pour elabor en Stratezi Nasyonal kont lapovrete pour Sesel. Sa i enkli en definisyon kler pour lopovrete dan konteks sesel. Anmenmtan i idantifye bann dimoun ki viv dan bann sityasyon preker e alert bann lazans konsernen pour lentervansyon imeydy, e kolabor avek sa bann menm lazans pour asire ki bann aksyon ki swiv i adekwa. Sa pe ganny fer atraver en lapros inovatif e sible ki tous non selman reveni, me osi tou dimansyon lapovrete; andotmo, en lapros milti-dimansyon. Bann program i enkli ;

- Bann lanket profil lapovrete pour idantifye bann ki pov, ki ava ede anver definisyon en lendeks nasyonal pour lapovrete, ki ava servi koman en labank lenformasyon (detabes) lo bann dimoun ki pe viv dan lapovrete, zot lakoz ek bann solisyon ki'n ganny enplimante dapre zot bann mankman.
- Zwenn avek bann ki ganny idantifye konman pov atraver bann klinik piblik ek vizit kominoter; e
- Remed rapid atraver partenarya efikas ant bann diferan lazans.

Anliy avek sa SR 20 milyon in prevwar anba bidze Minister Labita, Lenfrastriktir ek Transpor lo Later pour asiste sa bann tel lakour.

## **7. DEPANS ENPREVI**

Msye Spiker, pandan lannen 2018 nou pe pey konpansasyon staf Departman Kiltir anlidy avek problemn lenfeksyon sanpinyon. Sa balans ki reste pou ganny peye an 2019. Anplis, nou'n prevwar serten fon pour konpansasyon bann ka delo polisyon La Misere. Se pour sa rezon ki en bidze SR 50 milyon in ganny prevwar pour dan bidze 2019 konpare avek SR 20 milyon pandan bann dernyen lannen.

## **8. NOUVO POLISI DAN BIDZE 2019**

### **8.1 Logmantasyon Saler Minimom**

Parey tin anonse dan Leta Lanasyon 2018, saler minimom pou ganny ogmante par 5 pousan a parti le premye Zanyve 2019. Sa pou konm swivan ;

- Sorti SR 33.30 pou ariv SR 34.97 par erdtan pour tou travayer eksepte travayer *casual*
- Pour bann travayer *casual* ogmantasyon pou sorti SR 38.38 pou ariv SR 40.30 par erdtan.

Saler pou bann *home carers* ki travay a plen tan pour ganny ogmante par 5 pousan a parti le premye Zanyve 2019. Saler pou bann *home carers* ki pa travay a plen tan pou lo baz pro-rata.



## **8.2 Logmantasyon bann Benefis ek Programm Aprove pou Lazans pour Proteksyon Sosyal**

Msye Spiker, sa bann benefis pour ganny ogmante konm swivan ;

- Pansyon Retret pour sorti SR 5,050 pou ariv SR 5,250
- Benefis Envalidite ek Dezabilite pour sorti SR 5,050 pou ariv SR 5,250
- Benefis Fineray pour sorti SR 1,700 pou ariv SR 2,000

## **8.3 Logmantasyon Alawenns Etidyan dan Lenstitisyon Ledikasyon Tersyer**

Msye Spiker, avek bi asire ki nou bann etidyan ki pe etidye aletranze pe respekte bann kondisyon Visa e apour realiny alokasyon mansyel an relasyon avek pri lavi dan sa bann pei , Gouvernman pou ogmant alaoksasyon mansyel pour bann etidyan ki pe etidye aletranze, apartir Fevriye 2019.

An plis ki sa, bann etidyan ki pe etidye pour en degre liniversite Sesel pou osi resevwar en logmantasyon. Detay sa logmantasyon pou ganny donner par Lazans Nasyonal pour Devlopman Resours Imen.

## **8.4 Revwar Skim sibvansyon lakaz e Kontribisyon personel par HFC pour bann rezidan Pralen ek Ladig**

Gouvernman i note ki kou konstrikasyon lo Pralen ek Ladig anvi logmantasyon lo kou materyo an prenan kont kou transportasyon, i pli o ki Mae. Msye Spiker, an se moman tou bann aplikan HFC i bezwen kontribye 7.5% kontribisyon personel pou zot lon lakaz. Apartir le premye Zanyve 2019, tou bann zabitan lo Pralen ek Ladig pou ganny en redikasyon lo zot kontribisyon personel sorti 7.5% pou arrive 5%.

An se moman dan bidze, i annan en skim sibvansyon lakaz pou tou bann aplikan lon lakaz ki annan en lapey SR 25,000 ou pli ba. Gouvernman i dan prosedir pou revwar sa skim apre plis ki 5an lenplimantasyon pou ki i kapab target bezwen lasosyete. Gouvernman pou revwar formil ki i servi dan kalkilasyon sa sibvansyon pou bann zabitan lo Pralen ek Ladig, pou asire ki kou vremen o lo bann materyo konstrikasyon lo sa de zil i ganny konsidere. Sa i pou vin an fors le premye Avril 2019.

## **8.5 Retir VAT lo ton dan bwat**

Msye spiker akteylman i annan plis ki 500 kategori ek prodwi spesifik ki ganny enporte dan pei e ki ganny ekzanpsyon lo VAT. Dan nou zefor konzwent pou redwir pri ton dan bwat lo marse lokal pou tou Seselwa, IOT in kapab revwar son bann kou prodikasyon e son bann laliny distribisyon e in kapab fer desann pri son bann prodwi lo marse lokal. Pou konplimant sa redikasyon lo pri, gouvernman in deside pou retir sa 15 poursan VAT ki annan lo ton dan bwat. Sa redikasyon pou ganny entrodwir le premye zanyve 2019.

Msye spiker anvi ki ton dan bwat pe ganny servi dan repa dan bann lakour e en bon sours protein, nou espere ki sa redikasyon dan pri i a ogmant konsonmasyon ton dan bwat envi son bann benefis nitrisyonel.

### **8.6 Taks lo propriyete imobilye.**

Pandan diskour bidze 2018, ti ganny anonse ki taks propriyete imobilye ti aplikab lo tou propriyete rezidansyel ouswa lakonpanyen etranze. Apre diskisyon avek bann akter konsernen, Gouvernman in rekonsidere e deside ki taks imobilye pou aplikab zis lo propriyete rezidansyel etranze.

To taks pou reste 0.25% parey ti anonse lannen pase. Gouvernman pou finaliz prozedlwa pour asire ki son lenplimantasyon i komanse le premye avril 2019.

### **8.7 Taks lo disik**

Msye Spiker, depans Minister lasante pour tretman bann maladi ki lye avek konsonmasyon disik, enkli dyabet ek obesite i kout anviron SR 83.3 milyon par an, san kont bann kou endirek ki lye avek tretman bann maladi koze pa obesite. Baze lo sa lenformasyon, i annan apepre 11% popilasyon adilt ki soufer avek dyabet e 30% avek tansyon. Malgre sa, i'n estimen ki selman 50% sa bann pasyan i rode e swiv tretman. Dapre Minister Lasante, latizann pour dyabet ek tansyon i kout anviron SR 18.25 milyon par an, pandan ki bann kou konsiltasyon medikal, ek dyaliz i ariv anviron SR 65 milyon par an.

Msye Spiker, an 2019, gouvernman pour enpoz en taks lo bann labwason ki kontenir bokou disik. Sa i dan kad zefor Gouvernman pour ankouraz tou dimoun, me sirtou nou bann zanfan, pour diminye konsiderableman, konsomasyon bann labwason ki kontenir tro bokou disik e par konsekan redwir risk lobesite, dyabet ek lezot maladi non-transmisib.

Sa taks lo disik pou aplik pour tou labwason (enkli lalkol) ki son konteni disik i pli o ki 5g par 100ml e ki reprezant en to SR4 par lit. Bann zi fri fre, pou ganny egzansyon kont sa taks.

Prenan kont ki sa bann prodwi pou aprezan kapab ganny takse endirekteman, tou prodikter pou bezwen anrezistre avek younit taksasyon endirek (Excsie unit) dan divizyon ladwann e pour respekte tou provizyon Lalwa Taks Endirek 2009. Apar d bann lezot lenformasyon pertinan, i pou osi obligatwar pour bann enportater deklar konteni disik dan bann labwason enporte.

### **8.8 Taks endirek lo taba.**

Msye Spiker, pour fer fas avek fleo konsomasyon taba ekseksif, bann lefe ki sa i annan lo lasosyete e bann kou enportan dan bidze pour tretman bann maladi lye avek konsomasyon taba, Gouvernman pou, aparti Zanvye 2019, ogmant to taks endirek lo sa bann prodwi. Nou pou enplimant en logmantasyon 10% lo tou prodwi taba. Sa logmantasyon pou aplikab lo enportasyon e prodwir lokal. Sa nouvo to taks endirek pou aplik lo tou prodiksyon prodwi taba.

### **8.9 Revizyon taks lo enportasyon lavyann poul e lentrodiksyon taks lo enportasyon lavyann pork.**

Msye Spiker, avek bi siport devlopman sekter elevaz zannimo, Gouvernman pou ogmant taks lo lavyann pork ek lavyann poul enporte, apartir le premye zanvye 2019. Sa mezir pou enn kour term, avek bi redinamiz sa lendistri e donn li plis lavantaz vizavi bann lenportasyon konpetitiv.

Nouvo taks lo lavyann pork enporte pou 15% + SR 3 /KG.

Nouvo taks lo lavyann poul enporte pou 15% + SR 5.92/KG

#### **8.10 Ranboursman Taks Valer Azoute (VAT) lo prodwi aste Lokalman par bann biznes ki enplike dan lagrikiltir ek lapès.**

Msye Spiker, regilasyon VAT i fer provizyon pour ki bann dimoun ki pratik lagrikiltir, lapès ek bann aktivite ki sipòrt sa de lendistri pa bezwen pey VAT lo lenportasyon prodwi ek lekipman aprouve par Minister responsab pour Lagrikiltir ek Lapès.

Gouvernman pe amann regilasyon VAT pour permet bann fermye ek peser anrezistre, kalifye pour ranboursman VAT lo bann prodwi ek lekipman ki zot aste lokalman, (*sa pa enkli bann veikil, eksepté bann veikil spesyalize parey i sertifye par Minster responsab pour Lagrikiltir ek Lapès, ki osi benefisye atraver konsesyon lo taks endirek*) selman pour servi dan zot biznes. Lalis bann prodwi ek lekipman pou ganny defini dan en sedyoul egzansyon. Prosedir ranboursman VAT pou derould dan lord swivan:

1. Sa fermye/peser i aste en prodwi ouswa lekipman lokalman atraver en faktir (invoice) VAT e i demann en resi apre son tranzaksyon.
2. Faktir VAT ek resi i ganny anmennen kot Lazans Lagrikiltir ouswa Lotorite Lapès Sesel pour laprouvasyon.
3. Faktir VAT ek rise ki'n ganny aprouve i ganny anmennen kot Komisyon Reveni Sesel pour prosedir ranboursman.

En lalwa pe ganny propoze pour en tel mekanizm ranboursman, dapre bann prensip sanblab avek en mekanizm ki deza egziste pour ranboursman VAT kot erport. Sa lezislasyon i ave osi anpes okenn posibilite labi.

#### **8.11 Lamannman ki govern konsesyon taks endirek lo karbiran.**

Msye Spiker, avan transfer ek konsolidasyon tou kategori biznes ek dimoun ki kalifye pour konsesyon ek egzansyon lo karbiran anba regilasyon taks endirek (Fuel concession/Exemption) Regulation in 2018 - (S.I 27 of 2018), provizyon pour konsesyon ek egzansyon lo karbiran ti divize anba plizyer regilasyon. Enn sa bann tel regilasyon ti Tourism Incentives Act (TIA) ki ti ganny entrodwi an 2003, ki ti akord plizyer lavantaz fiskal pour bann lorganizm ki annan en lyen avek tourizm avek bi ranforsi devlopman dan sekter tourizm. I ti permet bann lorganizm avek permi operater dan leberzman, restoran, operater sant plonze, operater vizit gid, lokasyon bato, servis ferry, operater yot ek sezour abor bato pour benefisye avek: to taks biznes spesyal, rediksyon lo permi travay (GOP), rediksyon spesyal ouswa posib lo serten depans, e taks komersyal (lo bann pti prodwi neser pour loperasyon, lo veikil ek lekipman kapital) e osi konsesyon taks lo karbiran. Bann antite ki benefisye avek sa bann lavantaz (enkli konsesyon taks

lo karbiran) i posed en sertifika TIA (valid pour 5 a 10 an) ki servi koman laprev zot kalifikasyon pour sa bann tel lavantaz. Mazorite sa bann sertifika pour ekspire an 2018.

Konsesyon karbiran in kout SR 364.4 milyon e SR 411.8 milyon pour lannen 2016 ek 2017 respektivman. Sa i enkli bann konsesyon ki egziste anba regilasyon konsesyon karbiran, ki enkli PUC ek SPTC.

Sa Revizyon ti'n ganny propoze avek lentansyon enplik konsiltasyon piblik e an rezilta anil lalis sa bann antite (ki annan sertifika TIA) e fer ki konseyon ek egzansyon i ganny retire e fer ki zot bezwen pey taks entegrak lo tou karbiran ki zot aste. Swivan konsiltasyon piblik ki ti fer an 2018, Gouvernman pou antreprann bann reform swivan;

1. Mentenir dapre bann to ki'n endike dan sedyoul 1 lo regilasyon karbiran pour bann antite ouswa kategori tel ki PUC, SPTC, SFA, bann lakonpanyen mandate par Gouvernman pour antreprann aktivite lo bann zil elwanyen, Transportasyon aeryen domestik, propriyeter bato, konsesyon karbiran anba bann lagreman sinyen par gouvernman sesel, bann operater ferry sertifye pour transportasyon kargo.
2. Bann operater akomodasyon ki annan permi ki pa konekte avek grid PUC ek ki servi karbiran pour prodwi zot prop elekrisite pou ganny garde. Par kont enn fwa ki PUC in pare pou enkli zot lo grid, bann konsesyon pou nepli aplikab.
3. En lapros anilasyon gradyel pour anil konsesyon karbiran pour bann operater TIA ki annan permi dan lokasyon bato, sant plonze, tour operater, bato kwazyer, operater yot ek sezour ekskirsyon. Sa bann konsesyon pou ganny redwi gradyelman ziska 2020 letan zot pou bezwen pey taks entegral lo karbiran ki zot aste.
  - a. Apartir zanvy 2019, bann konsesyon pou redwi sorti 50% ziska 25%
  - b. Apartir zanvy 2020 sorti 25% ziska 0.
4. En lapros anilasyon gradyel pour anil konsesyon karbiran pour bann operater TIA ki annan permi dan operater servis elikopter. Sa bann konsesyon pou ganny redwi gradyelman ziska 2020 letan zot pou bezwen pey taks entegral lo karbiran ki zot aste.
  - c. Apartir zanvy 2019, bann konsesyon pou redwi sorti 25% ziska 12.5%
  - d. Apartir zanvy 2020 sorti 12.5% ziska 0.

### **8.12 Reform Taks Biznes.**

Msye Spiker, dan bidze 2018, plizyer mezir ti ganny anonse pour reform dan lalwa taks biznes. Lalwa ki konsern Base Erosion profit shifting in ganny gazete e i devan lasanble nasyonal pour ganny table pour dezyenm lektir enn fwa ki nou konplet prosedir bidze. Bann propozisyon

lamannman ki devan Lasanble Nasyonal i sipoze fer kler ki selman reveni ki ganny akerir apartir Sesel ki ganny takse dan Sesel, ki vedir i en sistenm taks teritoryal.

An sa ki konsern Base Erosion Profit Shifting, i annan lezot lamannman dan lezot lezislasyon ki bezwen ganny fer avan le 31 desanm 2018. Sa bann lezislasyon swivan i devan lasanble nasyonal pou ganny table swivan proses bidze;

- Lakonpanyen (Permi spesyal) (Lamannman) Lalwa 2018
- Sekirite (Lamannman) Lalwa 2018
- Fon kolektiv ek fon spekilativ/lasirans (Lamannman) Lalwa 2018
- Lakonpanyen Biznes Enternasyonal (Lamannman) Lalwa 2018
- Lasirans (Lamannman) Lalwa 2018
- Zon komers Enternasyonal (Lamannman) Lalwa 2018

Msye Spiker, an plis ki sa reveni enpozab(taxable) pour biznes labank delokalize (offshore) pe ganny takse lo en to 3%. Sa provizyon anba lalwa taks biznes pou reste an viger ziska le 31 desanm 2018. Apartir le premye zanvye 2019, taks biznes normal ki aplikab pour bann labank ava aplike.

Msye Spiker, anliny avek nou bann langazman, nou pou bezwen anmenn enplimant nou bann rezim taks preferansyel ki kontenir bann aktivite delokalize (i.e prodiksyon, lasanblaz e redistribisyon bann aktivite anba lalwa ITZ) anliny avek bann kondisyon Linyon Eropeen apartir desanm 2019. Sa pou ganny diskite pandan premye kar 2019.

Msye Spiker, en lamannman mazer ki pe ganny propoze dan prozedlwa lamannman taks biznes aktyel i konsern bann akizisyon kapital apartir lavant byen bann biznes. Bann lamannman i fer kler ki okenn sirplis ki gannyen apartir lavant en byen pa pou ganny takse. Sa ava aplik zis pour sonm ki'n demande pour depresyasyon taks.

An plis ki sa, en lot lamannman ki'n ganny diskite avek Komite Prozedlwa i ki okenn reveni lo ki withholding taks in fini ganny sarze pou ganny konsidere koman dernyen peyman taks lo sa reveni ki'n evalye.

Msye Spiker, en lot lamannman ki'n ganny enkli dan sa prozedlwa i pour koleksyon sa taks 5% lo okenn reminerasyon ki peye anliny avek performans divertisman par en animater ouswa atlet profesyonnel ki pa en rezidan sesel.

Gouvernman i annan lentansyon redwir to taks biznes apartir 2020. An plis ki sa, konze fiskal pou ganny akorde avek bann biznes dan bann sekter partikilye, tel ki okenn biznes ki eksport en gran kantite zot prodwi lo marse enternasyonal ek biznes ki investi bokou dan bann lekiman kapital.

Sa i serten legzanp, me gouvèrnman pou antreprann bann diskisyon avek kominote biznes pandan premye lanmwaye lannen 2019 pour asire ki bann nouvo lamannman i ganny prezante devan lasanble Nasyonal pour bidze 2020.

Msye Spiker, plizyer mezir ti ganny anonse dan diskour bidze 2018. Zot pou ganny anvoye ziska ki nouvo rezim taks biznes i ganny diskite avek bann parti konsènen. Son lenplimantasyon in prevwar pour apartir 2020. Bann lamannman ki pou ganny ranvoye i enkli:

- En sonm fiks SR 3,000 pour bann biznes ki fer en reveni pa plis ki SR 500,000 par an.
- En poursantaz fiks 3% pour bann biznes ki fer en reveni par lao SR 500,000 ziska 25 milyon.
- Anilasyon depresyasyon akselere (Accelerated depreciation) e 200% dediksyon posib pour kou marketing ek promosyon dan sekter tourizim.
- Rediksyon taks biznes lo lozman rezidansyel apartir 15% a 3%.

Msye Spiker sistenn Pay as you go, ki ti aplik pour serten biznes spesifik kot zot ti kalifye pour dediksyon 5% taks zot reveni alasours pou nepli egziste apartir Zanvye 2020. Sa bann biznes i enkli, kontrakter konstriksyon, kontrakter menntenens, mekanisyon, alokater ouswa operater plant ek lekipman, alokater omnibis.

Dezyenn faz reform taks biznes pou kontinyen par diskisyon avek kominote biznes. Lentansyon se pour gouvèrnman travay avek sekter prive pour trouv en opsyon pli senp. I pou osi viz ver senplifikasyon bann loperasyon Komisyon Reveni Sesel e redwir nou gran depandans lo reveni taks pour finans bidze e osi en gro presyon pour rekrit plis personel pour travay dan divizyon taks.

### **8.13 Definisyon Reveni an gro anba lalwa ki gouvèrn taks anba program Responsabilite Sosyal (CSR) 2013 ek lakt ki gouvèrn Taks dan domenn Marketing pour Tourizim 2013.**

Konsèrn prensipal ki nou pe fer fas avek i ki serten biznes i bezwen prelev taks CSR lo zot reveni an gro, dan en manyer sistematik, sa i kapab annnan en lefe advers lo sa biznes. Nou pe pans sirtou lo bann Bureaux de change, lazans vwayaz, tour operater sesel ek lezot lakonpanyen ki oper lo baz komisyon. Sa i akòz reveni ki sa bann biznes i fer i pa nesèman pour zot, me normalman zot bann azan ki pe travay pour en komisyon.

Anba lalwa taks biznes 2009, i annnan en definisyon reveni enpozab (ki kapab ganny takse) ki annnan preski menm prensip ki 'reveni' anba Lalwa Responsabilite Sosyal Organizasyonnel 2013. Sepandan i pli restrikte dan sans ki i pli spesifik lo size reveni ki ou ramase.

Msye Spiker, apartir Zanvye 2019, pour reste konsistan, Gouvèrnman pou aliny definisyon 'reveni' anba lalwa CSR 2013 e lalwa Taks Tourizim ek Marketing 2013 avek definisyon 'reveni enpozab' anba lalwa taks biznes 2009.

#### **8.14 Ranforsman peyman 'royalties' avek Drwadoter vizavi Lasyosyason bann Loter ek Konpoziter Seselwa (SACS)**

Lalwa drwadoter 2014 i permet Sosyete bann loter ek konpoziter kolekte e distribye *royalties* delapar zot bann manm, pour lilitizasyon komersyal zot bann travay.

Sepandan, SACS ti pe rankontre difikilte vizavi koleksyon bann *royalties* ek bann letablisman *entertainment* tel ki lotel, diskotek e bar piblik ki pe ganny benefis komersyal lo bann prodwi lanmizik. Se pour sa ki SACS ek Lotorite Laysennsing in dakor pour travay lo en lagreman mityel (MOU) pour asire ki Lotorite Laysennsing i enkli en lartik *compliance* avek Lakt Drwadoter 2014, ki donn pouvwar SACS pour kolekte *royalties* ek sa bann letablisman.

Aprè plizyer deliberasyon e answit, laprouvasyon Konsey Minis le 14 Mars 2018, lamannman in fer lo laysenns labwason for ek Aktivite Oplenner, dan Regilasyon 1998, ensi ki laysenns pour bann letablisman ki ofer leberzman, *catering* ek *entertainment* dan Regilasyon 2011. Sa lamannman i fer provizyon pour enkli kondisyon dan laysenns ki obliz sa bann letablisman oubyen dimoun ki pe fer sa bann aktivite oplenner pour pey SACS *royalties* avan i ganny oubyen renouvle zot laysenns. I ekspekte ki sa bann regilasyon i ava ganny pibliye an 2019, swivi par sinyatir sa lagreman mityel.

#### **8.15 Lentrodiksyon en Fre pour Preskripsyon dan Sistenn Lasante**

Msye Spiker, pandan sa 40 dernyen lannen, okenn seselwa pa'n bezwen fer okenn kontribisyon anver servis lasante. Par kont, pandan sa 10 dernyen lannen bidze sekter lasante in ogmamte sorti SR 315.2 milyon ziska SR 1.02 bilyon. Tou dimoun pou bezwen komans pran swen avek son prop lasante. Alors, letan in arive pour Gouvernman komans sarz en fre preskripsyon zis SR 25. Msye Spiker, bann latizann pou reste gratwit. Bann zanfan anba laz 18 an, bann etidyan a plen tan, bann dimoun aze ek bann pasyan avek bann maladi *chronic* pa pou bezwen pey sa fre preskripsyon. Sa pou komans apartir dan premye kar 2019.

#### **8.16 Revizyon dan bann Kou ek Fre**

Lalwa Lotorite Servis Maritim Sesel (SMSA) in ganny aprouve par konsey minis e i ekspekte pas devan lasanble nasyonal dan dernyen kar 2018, ki a fer ki Lotorite Servis Maritim Sesel a vin en lotorite otonom. Sa ava donn (SMSA) pouvwar an 2019 pour pran an sarz plizyer konsern maritim, pou fer li mandatwar pour bann bato (enkli bato lapes) anrezistre e ganny kontrole. Sa ava pormouvwar sekirite ek navigabilite bann bato. Sa pou enkli nouvo revizyon bann fre ek sarz, vi ki zot pa ankor ganny revize depi sa dernyen 20 an.

Lazans biosekirite nasyonal in fer en revizyon pour amelyor lalis bann kontravansyon, bann penalite fiks, ek bann fre anba Fre ek rigilasyon dapre lalwa Proteksyon Plant ek zannimo (2014). Bann eleman kle sa revizyon i enkli:

- Senplifye e redwir lakantite fre biosekirite sorti 90 pour vin 70.

- Anil opsyon permi lenportasyon miltip (Multilpe import permit) ki valab pour 3 a 6 mwan vi ki bann kondisyon fitosaniter i sanz frekaman dan serten pei eksportater. Zis opsyon en sel permi lenportasyon (Single import permit) ki pou reste, parey i deza leka dan lezot pei tel ki Sidafrik.
- Anil tou fre lenspeksyon ek lezot fre baze lo letan ki'n pase dan e andeor lofis, akoz i difisil pour anfori e pa ti pe ganny servi. I pou ganny ranplase par en fre fiks.
- Met azour bann fre biosekirite alinye avek nivo kou aktyel dapre program bidze baze lo performans Lazans Biosekirite Nasyonal pour amelyor rekiperasyon kou.

### **8.17 Revi Lezislative bann Lalwa Nasyonal lo Propriyete Entelektyel**

Swivan bann derynyen devlopman, an 2018, Komite nasyonal pour propriyete entelektyel ti diskite bezwen pour revwar Lalwa propriyete endistriyel e osi lalwa drwadoter 2014. Enn parmi bann rezilta en proze finans par Commonwealth, ti rekomandasyon lamannman Lalwa propriyete endistriyel 2014 dan serten domenn. Deplis, anvi bann posibilite akse avek bann protokol IP ek kreasyon en sel lofis IP, nou pou bezwen fer en revizyon aprofondi bann lalwa nasyonal aktyel, pour asir konformite avek meyer pratik enternasyonal. Sa revi i ekspekte finalize pandan 2019.

### **8.18 Prosedir pour met anfor Lalwa pour Aksyon Remedyal dan Komers, e son Dezyenm Faz Lenplimantasyon**

Msye Spiker, Minister Finans, Komers, Lenvestisman ek Plan Ekonomik i dan prosedir devlop bann lezislasyon nesese pour permet met anfor bann mezir remedyal pour komers dan Sesel. I ekspekte ki nou bann lendistri domestik i a ganny rekour avek sa bann mezir dan ka kot zot in ganny afekte par serten kondisyon advers an rezilta liberalizasyon komers. Sa bann mezir i kapab ganny aplike dan ka kot lenportasyon i ogmante soudennman, dan ka *dumping*, oubyen dan ka bann lenportasyon sibvansyonnen ki afekte lendistri domestik ki fer menm prodwi. Sa bann lezislasyon pe ganny devlope avek lasistans en konsiltan ki'n ganny sa kontra anba *SADC Trade Related Facility*.

Sa bann lezislasyon i espekte enkli son Lalwa e son bann regilasyon, ki pou dedye a sa trwa mezir remedyal ki, mezir sofgard, mezir kont lavant ki tro ba konpare ek pri enternasyonal e mezir kont bann pratik sibvansyon ki afekte kompetitivite nou lendistri lokal.

I espekte ki sa bann lezislasyon pou ganny prezante devan lasanble nasyonal lannen prosenn.

Adisyonneman, i espekte ki dezyenm faz sa proze, ki pou konsantre lo lenplimantasyon, pou konmans dan premye trimes 2019.

## **9. REFORM DAN KOLEKSYON REVENI GOUVERNMAN**

### **9.1 Lotorite Laysenning Sesel**

Msye Spiker, travay in komanse lo revizyon lalwa Lotorite Laysenning Sesel ek son bann regilasyon. En konsiltan in ganny rekrite e in fer en analiz pour idantifye bann pwen for ek pwen feb sistenm aktyel e evalye bann loportinite amelyorasyon dan konteks bann risk pour sesel. Lobzektif sa analiz sete pour redwir bann fardo administratif e pour amelyor lanvironnman biznes pandan ki nou mentenir bann standar pour protez sekirite piblik, lasante, e protez lanvironnman. Lanaliz in



identifye serten kategori permi ki kapab ganny retire. I'n osi konsider kou laysenns, peryod renouvelman ek bann prosedir ki swiv dan delivrans ek ranforsman bann laysenns.

Finalman, levalyasyon in enkli en revizyon bann fonksyon, pouvwar ek responsabilite Lotorite Laysenns Sesel. En konsiltasyon avek bann parti konsernen ti ganny fer le 26 septanm 2018. Sa pou ganny prezante avek konsey minis boner an 2019 pour ki bann lezislasyon i ganny revize e ganny propoze pandan 2019.

Msye Spiker, aktyelman, divertisman spor pa ganny regilarize par okenn lalwa. Bann aktivite divertisman spor i enkli bann kalite spektak ki prezant en levennman ki annan en laspe kompetitiv ki enplik en o nivo adrenalin avek bi diverti lodyans ouswa fer kompetisyon. Vi natir sa bann aktivite, i nesese pour annan en kad ki ava pran zot ansarz. An prenan kont bann kalite spor, sekirite, nivo lenvestisman, sirveyans ek ranforsman, sa i kapab pli byen ganny zere anba en kad laysenns. Gouvernman pe finaliz en kad laysenns pour sa bann aktivite.

## **9.2 Transfer Pricing ek Kad Deklarasyon Kolektiv (Common Reporting standard.)**

Msye Spiker, depi septanm 2017, komisyon reveni sesel pe esanz lenformasyon tel ki detay kont labank avek son bann omolog enternasyonal. Sa i anliny avek bann regilasyon Ladministrasyon Reveni (Common Reporting Standards). Lenformasyon ki ganny partaze i lenformasyon finansyel lo tou dimoun ki pa pey taks sesel ki annan en kont avek en antite finansyel. Bann tel lenformasyon ki Komisyon Reveni Sesel i resevwar i ava ede dan odit bann dimoun ki rezidan sesel ki'n fer peyman prodwi ek servis atraver en kont labank aletranze ouswa en antite etranze, e pa'n deklare sa reveni dan zot deklarasyon taks. (*Common Reporting Standards*) i ava alor redwi posibilite lenvazyon fiskal atraver bann kont labank ouswa lenvestisman delokalize e asire ki tou rezidan Sesel ki sipoze pey taks i pey zot par ki zot devret anver leta. Ensi, mon ankouraz tou rezidan ouswa antite dan sesel ki pe fer tranzaksyon atraver kont labank aletranze pour asire ki tou lenformasyon reveni pe ganny deklare avek Komisyon Reveni Sesel.

Msye Spiker, en lot konsern ki'n ganny diskite oparavan ek ki reste en konsern i *transfer pricing* avek bann lantrepriz miltinasyonal. *Transfer Pricing* i toultan klase parmi bann pli o konsern bann lotorite taks. Lanfaz vizavi *Transfer Pricing* i ekspekte entansifye globalman dan bann lannen ki pe vini.

Msye Spiker, anliny avek sa, e dapre kondisyon OECD anliny avek linisyativ BEPS, Gouvernman pe finaliz en regilasyon ki pou obliz bann lakonpanyen miltinasyonnal ki annan en reveni anyel pli o ki 750 milyon ero, ki pe oper dan Sesel ouswa ki annan en lazans ouswa reprezantasyon sesel pour soumet zot deklarasyon avek Komisyon Reveni Sesel. Msye Spiker, nou pou travay avek Komisyon Reveni Sesel pour ogmant latansyon lo bann odit *transfer pricing*.

Sepandan, pour bann MNE ouswa lakonpanyen ki zot reveni anyel i mwens ki 750 milyon ero ki pe oper dan Sesel ouswa ki annan en lazans ouswa reprezantasyon Sesel, en lekipe sorti kot Fon

Moneter Enternasyonal pou Sesel boner 2019 pour evalye sityasyon aktyel e ogmant kapasite nou bann oditer taks anliny avek bann prosedir OECD.

### 9.3 Sekter Enformel

Msye Spiker, ozordi zour, i annan nouvo lentere dan lekonomi enformel partou dan lemond. Sa i akoz lekonomi enformel pe grandi dan diferan konteks e pe fer son laparans dan nouvo sekter. Sekter enformel i konpri tou bann aktivite ki fonksyonn andeor sistenm ofisyel e legal, ki fer ki i annan bokou lakin dan lenformasyon statistik dan sa sekter. Msye Spiker, napa okenn polisi lentervansyon ki adres bann konsern ki asosye avek lekonomi enformel. En seri lentervansyon i bezwen ganny konsidere e enplimante. An plis, sa bann lentervansyon i bezwen kapab adres bann kontrent, bezwen e risk ki spesifik a sak group diferan dan sekter enformel. Se avek sa antet ki an 2019, Labank Mondyal pou asiste Gouvernman avek en letid lo sekter enformel dan Sesel. Ler sa letid i a'n fini, nou ava asire ki bann reaksyon vizavi polisi i apropiye pour bann kontrent ek risk ki sa sekter i fer fas avek.

### 9.4 Aryeraz Taks Komisyon Reveni Sesel

Msye Spiker, le 30 Septanm 2018, aryeraz Komisyon Reveni Taks Sesel ti SR 850.6 milyon dan sa bann seksyon swivan:

- Taks Primer SR 417.8 milyon
- Penalti SR 432.8 milyon

Sepandan, sif ki Komisyon Reveni i kapab rann pourswiv i ariv zis SR 424.3 milyon pour sa bann rezon swivan:

- SR 95.7 milyon in ganny amande apre ki *tax payers* in donn nouvo lenformasyon
- SR 260.0 milyon ka lobzeksyon pe ganny swiv par seksyon legal Komisyon Reveni.
- SR 46.7 milyon pe ganny pourswiv
- SR 20.6 milyon pou bezwen ganny *write-off* vi ki bann dimoun konsernen in desede e zot biznes in dizourd
- SR 3.3 milyon in ganny met devan Tribinal Reveni

Msye Spiker, Komisyon Reveni pe fer en zefor imans pour kolekte bann det ki ankor reste, atraver diferan stratezi, ki enkli:

- *Garnishee Notice*
- Restriksyon Paspor
- Enterdiksyon pour kit pei
- Prosekisyon bann direkter lakonpanyen, dapre konsey Prokirer Zeneral.

## 10. LOPORTINITE LENVESTISMAN

Msye Spiker, Gouvernman in bezwen revwar son stratezi privatizasyon, baze lo kondisyon ekonomik ki nou fer fas avek aktyelman. Nou pou nepli privatiz SEYPEC parey ti'n anonse avan. Sepandan, Gouvernman i annan 60% par dan Labank Komersyal Sesel, e *account holder* i annan 40% par. Nou bezwen amenn Labank Komersyal Sesel lo en lot nivo pour asire ki *account holders*

i resevwar plis *dividend*. Donk, Gouvèrnman pou ofè en partnèr stratejik 50% dan son par ver Zilyet 2019.

Msye Spiker, Gouvèrnman pou donn sipòr nesèser pou etabli nou premye fon lenvestisman, ki atavèr en metod finansman endirek, i a kontribye anver bann bezwen lenfrastriktir nou pei. Sa lapros entermedyer i anmèn plizyèr lavantaz, enkli:

- i. mitigasyon plizyèr risk ki asosye avèk metod direk pou lev fon;
- ii. ouvèr akse avèk finansman atavèr en pli gran baz lenvestisèr ki annan en pli gran varyete *risk appetites* ek *investment needs*. Sa i posib lèr zot met zot resòrs ansanm dan en sel fon; e
- iii. diversifye risk lenvestisman, e donk ogmant lefikasite ekonomik.

Metod lev fon endirekteman i a osi ouvèr posibilite pou en baz lenvestisman pli gran e pli soutenab ki a kapab partisip dan en laranzman piblik/prive vizavi bann proze lenfrastriktir.

## **11. ZESYON DET PIBLIK**

Msye Spiker, an Septanm 2018, nou det total koman en pòrsantaz Prodwi Domestik Brit ti 59.6%. Koman en Gouvèrnman, nou restè angaje pou redwir total det piblik ziska 50% nou GDP pa pli tar ki 2021. Pou premye fwa, nou'n enkli en *fiscal risk statement* ek bidze 2019. Sa i permet devwal okenn risk finansyer dan bann lantrèpriz Gouvèrnman. Donk, Gouvèrnman in met okler tou garanti oubyen lezot langazman presiz dan son bann lantrèpriz.

Msye Spiker, pou lannen 2019, Minisèr Finans, Komèrs, Lenvestisman ek Plannifikasyon Ekonomik pe lans trwa bond long term an kolaborasyon avèk Labank Santral Sesel: 3 an, 5 an, e 7 an. Sa i a ofè Seselwa bann fasilite adisyonnèl pou zot investir, e asire ki nou prolonz matirite nou det domestik.

## **12. FORMAT ZESYON GOUVERNMAN KI BAZE LO REZILTA**

Apre bann reform mazer dan kad fiskal ek sèkter piblik, Sesel pe aprezan bouz lo dezyenn zenerasyon reform dan sèkter piblik pou ankouraz plis krwasans enklizif. Sa bann reform i o sant bann prensip Prezidan vizavi latransparans, devwar pou rann kont, ek bon gouvèrnans. Konsey Minis in aprouv polisi *results-based management (RBM)* koman en fondasyon pou sa bann reform vizavi performans. Bi sa bann reform se pou met plis konsantrasyon lo bann rezilta dan tou sèkter Gouvèrnman, pou amelyor efikasite, efektivite, latransparans, e *accountability* dan sèkter piblik, avèk en bi mazer pou ankouraz krwasans ekonomik, diversifikasyon ekonomik ek lenklizyon sosyal atavèr tou sèkter.

Msye Spiker, bidze 2019 pou baze antyèrman lo metod Program Performance Based Budgeting. Sa prosesis in komans depi an 2015 e in ganny pilote par bann minisèr ki annan portfolio ledikasyon, lagrikiltir ek lapès. 5 an pli tar, nou annan en bidze konpreansif avèk bann endikater performans ki kler atavèr tou minisèr, departman ek lazans. Msye Spiker, dan bidze 2020, *ceiling* bidze pou ganny *allocate* dapre portfolio, e bann minisèr, departman ek lazans i bezwen diskite e

agree lo *ceiling* pour zot departman endividyel. Sa i ava baze lo bann priorite dan sa portfolio e bann target ki bezwen ganny atenn.

Sepandan, prosen faz se pour relye bann stratezi sektoral dan sa *Program Performance Based Budgeting* pour nou kapab vwar plis son loriyantasyon lo rezilta. Msye Spiker, le 2 Novanm 2018, draf *Seychelles Vision 2033* ti ganny diskite avek tou *stakeholders*. Lobzektif se pour lans Vizyon Nasyonal an Zanvyè 2019. Adisyonnèl, an 2019, Gouvernman pou asire ki nou konplet tou bann stratezi sektoral e asire ki zot anliny avek vizyon nasyonal.

Msye Spiker, lot pilye ki nou'n komans pilote i *Monitoring and Evaluation*. Kreasyon ek ladopsyon en polisi evalyasyon ek gid pour performans in finalize. Lenplimantasyon in ganny pilote dan de sekter e de nouvo sekter in komans sa pilotaz. Reform Servis Piblik pe ganny dirize par Depart Ladministrayon Piblik. Reform dan sa katriyenm pilye in aprezan vin ase irzan pour asire ki Gouvernman i kapab delivre son servis efektivman e avek efikasite. Sa bann reform i adres bann konsèrn ki pe ogmante vizavi performans servis piblik, an term son zesyon ek son dimansyon. Msye Spiker, Gouvernman i anvizaze konplet son *Results Based Management Framework* ver lafen 2021.

### **13. LANGAZMAN SOSYETE CIVIL**

Msye Spiker, Gouvernman in reste angaze pour travay avek sosyete sivil. En bidze SR 3 milyon in ganny prevwar pour CEPS an 2019. Adisyonnèlman, i annan en alokasyon SR 19.1 milyon pour diferan program anba Program Sosyal Gouvernman pour bann proze kominoter ki organize par sosyete sivil. Koman parti lagreman ki'n sinyen ant Gouvernman ek CEPS an 2018, tou le de parti pou azir koman partener pour siport sosyete sivil.

Pandan Septanm 2018, prosedir *grant* ti ganny lanse pour sosyete sivil kapab soumet zot form laplikasyon. Sete Minister Finans, Komers, Lenvestisman ek Plannifikasyon Ekonomik ki ti pe fer sa prosedir oparavan. Prezan, sa prosedir pe ganny fer atraver en komite nasyonal ki enkli CEPS ki evalye tou laplikasyon, an servan en prosesis transparan.

Adisyonnèlman, Rezistrar Zeneral pe travay avek CEPS pour asire ki i annan revè lo bann lezislasyon aktyel ki regulariz striktir ki bann lorganizasyon sivil i fonksyonn ladan. Sa prosesis pou konplete an 2019.

### **14. KONKLIZYON**

Msye Spiker, semenn pase, le 31 Oktob 2018, nou ti selebre 10an nou program reform ekonomik. Nou konnen ki sa pa'n en prosesis fasil, me koman en pti leta zil, nou bezwen asire ki nou reste rezilyan e pare pour okenn lefe advers ki lekonomi mondyal i kapab koz nou.

Nou oule ki tou Seselwa i konpran ki i annan en nesosite pour nou kontinyen travay dir e reste ini fas a okenn tanpet. Si nou fer sa, ansanm nou a reisir.

Msye Spiker, se pour sa rezon ki bidze 2019 i vize ver soutenans nou progre ekonomik.

Mon ti a kontan remersye Prezidan Larepublik pour son gidans ek sipor pour lepep Seselwa e Sesel.  
Mon ti kontan osi remersye mon bann koleg minis ek zot lekip.

Mon remersye mon staf dan Minister Finans, Komers, Lenvestisman ek Planifikasyon Ekonomik  
pour zot travay lekip, zot profesyonalizm ki'n reste entak, ek zot motivasyon pour reisir, pour  
lekonomi Sesel.

Mon ti a kontan felisit bann manm sektè prive ek sosyete sivil ki pe vreman fer zot prezans konte  
pour nou pei e pour nou pep. Mersi pour zot lespri kolaborasyon.

Mon oule remersye kominote enternasyonal ki'n travay avek nou pandan sa bann dernyen lannen  
pour asire ki nou devlopman sosyoekonomik i benefisye sak Seselwa.

Mersi osi, tou manm Lasanble Nasyonal, e ou osi, Msye Spiker.

Mon ti a kontan remersye pep Seselwa pour zot konfyans dan direksyon ekonomik nou pei.

Aprezan, mon remet sa *Appropriation Bill* 2019 ki ariv SR 8,463,947,478 pour laprouvasyon  
Lasanble Nasyonal.

Mersi Msye Spiker.